

S T E N O G R A M

**Prve Radne sjednice Skupštine Kantona Sarajevo
Održane 23.03.2015. godine sa početkom rada u 10,00 sati**

Predsjedavajući:

Pozvao bih uvažene zastupnike i zastupnice da uđu da počnemo sa radom. Možemo krenuti sa radom.

Otvaram Prvu Radnu sjednicu Skupštine Kantona Sarajevo.

Pozdravljam uvažene kolege i kolegice poslanike, članove Vlade i uvažene goste, kao i predstavnike medija koji prate rad današnje sjednice.

Nadam se da će cijenjeni gledaoci Televizije Kantona Sarajevo sa pažnjom pratiti rad današnje Skupštine, te im upućujem pozdrave, a svima nama želim uspješan rad i ugodnu radnu atmosferu.

Prema evidenciji Službe, sjednici prisustvuje 33 poslanika što je dovoljan broj za punovažan rad i odlučivanje.

Izostanak sa ove sjednice opravdali su: uvažena zastupnica Babić Ana i uvaženi zastupnik Amor Mašović. Imamo 34. gospodin Mašović je upravo stigao.

Prijedlog dnevnog reda Prve Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 23.02.2015.godine.

Na osnovu člana 73. Poslovnika Skupštine Kantona Sarajevo („Službene novine Kantona Sarajevo“ – (Drugi novi prečišćeni tekst, br: 41/12, 15/13 i 47/13), Kolegij Skupštine Kantona Sarajevo, dana 19.03.2015.godine, prihvatio je zahtjev Komisije za izbor i imenovanja i administrativna pitanja Skupštine Kantona Sarajevo da se Prijedlog dnevnog reda 1. Radne sjednice, dopuni sa sljedećim tačkama :

1. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo; (razmatrat će se kao tačka 3.)
2. Prijedlog odluke o imenovanju predsjednika, zamjenika predsjednika i članova Odbora za javna priznanja Kantona Sarajevo; (razmatrat će se kao tačka 4.)
3. Prijedlog odluke o imenovanju zamjenika pravobranioca Pravobranilaštva Kantona Sarajevo; (razmatrat će se kao tačka 5.)

Prelazimo na utvrđivanje dnevnog reda današnje sjednice.

Na osnovu naprijed navedenog, Prijedlog dnevnog reda današnje, 1. Radne sjednice, glasi:

1. Poslanička/zastupnička pitanja i inicijative
2. Prijedlog odluke o potvrđivanju Vlade Kantona Sarajevo
3. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
4. Prijedlog odluke o imenovanju predsjednika, zamjenika predsjednika i članova Odbora za javna priznanja Kantona Sarajevo
5. Prijedlog odluke o imenovanju zamjenika pravobranioca Pravobranilaštva Kantona Sarajevo;

Molim poslanike da se izjasne o Predloženom dnevnom redu.

Uvažena zastupnica Segmedina Srna je tražila riječ. Izvolite. Dajte mikrofona.

Poslanik/zastupnik Segmedina Srna:

Evo sada jeste zapravo je signalizirao da je upaljen. Dakle, uvaženi predsjedavajući, dopredsjedavajući, zahvaljujem za riječ. Pozdravljam sve prisutne. Kako je riječ o dnevnom redu želim samo nešto predložiti. Dakle iako je jasno kako predloženi dnevni red predstavlja ispunjavanje forme koja je definisana Poslovníkom mislim da ja javnost po pitanju današnje sjednice ipak od nas zastupnika očekuje da usvajanjem dnevnog reda Prve radne sjednice pet mjeseci nakon izbora pošaljemo drugačiju sliku, odnosno pokažemo da smo svjesni suštine onoga zbog čega smo izabrani u Skupština Kantona Sarajevo. Dakle veće dugo, slobodno mogu reći predugo građani Kantona Sarajevo očekuju od parlamentarne većine da se imenuje Vlada Kantona Sarajevo, što je naravno svi ćemo se složiti naša prioritarna obaveza kao zakonodavnog organa prema građanima, uz sve ostale Ustavom definisane nadležnosti. Stoga moram priznati da meni nije u redu da danas kada su očekivanja građana velika kako od imenovanja nove Vlade, tako i premijerskog ekspozea poslovnička pitanja i inicijative budu tačka broj 1. uvažavajući dakle sve ono što bi se trebalo pojaviti u okviru te tačke i potpuno svjesna, dakle član 211. definiše obavezu Kolegiju po pitanju predlaganja dnevnog reda radnih sjednica predlažem da zbog javnosti koja prati ovu sjednicu još jednom ponavljam, ima ogromna očekivanja od svega onoga što će biti rečeno i učinjeno po pitanju tačke 2. dnevni red promijenimo i tačku poslanička pitanja odložimo za narednu sjednicu. Ja se nadam da će kolege razumjeti moju namjeru i mislim da svi oni koji su pripremili pitanja neće zamjeriti ako ista postavljaju sljedeći put kada će član Poslovníka i suštinski biti ispunjen, odnosno kada ćemo imati imenovanje u punom kapacitetu i na raspolaganju kako za usmene tako i za pismene odgovore. Zahvaljujem.

Predsjedavajući:

Hvala kolegici. Imamo uvaženi zastupnik Kojović.

Poslanik/zastupnik Predrag Kojović:

Zahvaljujem predsjedavajući. Ja bih samo ako mogu dobiti mala pojašnjenja vezano za sljedeću dilemu koju imam. Mi smo imali zakazanu Prvu radnu sjednicu koja je potom odgođena. Poslovník čini mi se u članu 204. govori o tome da 12 dana prije zakazivanja sjednice na kojoj će se imenovati Vlada moraju se dostaviti imena predsjedavajućem Skupštine, odnosno vama koji taj materijal odmah prosljeđuje Komisiji za imenovanja. Hoću da kažem ovo: ja sam vas konsultirao prije početka ove sjednice i vi ste mi rekli da je ovo nastavak Prve radne sjednice. Ako je ovo nastavak Prve radne sjednice ne znam zašto onda utvrđujemo dnevni red jer dnevni red je već bio utvrđen i ne može se naknadno utvrđivati. Ta tačka dnevnog reda je prošla. Imam također isto slična razmišljanja kao i kolegica Segmedina. Znači potpuno nam je jasno da je interes građana Kantona Sarajevo da napokon dobiju vladu. Ali samo ću s obzirom da je danas premijer Konaković podsjetiti ga u njegovo poslaničko vrijeme kada je u jednoj sličnoj situaciji kada je SDP odlučio da raskine koaliciju sa SDA zakazo i vodio jednu sjednicu na sličan način na koji se to danas radi, gdje je on naravno zastupao striktno poštovanje Poslovníka, i on će se sjetiti tada da je na iznenađenje mnogih tada Naša stranka glasala upravo na isti način, odnosno glasajući da je to nelegalno zakazana bila sjednica. I samo da ga podsjetim je li to znači sada da počinjemo ovaj mandat na vrlo sličan način na koji smo to radili u prošlom mandatu u smislu da se zakazuju sjednice. Mi ova imena i biografije nismo imali 12 dana prije ove sjednice. Hvala.

Poslanik/zastupnik Adnan Solaković:

Hvala lijepo. Pozdravljam sve prisutne. Podržao bih kolegice Segmedine ovaj prijedlog. Sadašnji ministri maltene nisu ni sjeli na fotelje, odmah ćemo ih obasuti pitanjima i inicijativa

gdje je vjerovatno biti toga mnogo od svih naših zastupnika. Prema tome ovo bih ja odložio, isto dajem podršku da se inicijative i pitanja isto ostave za sljedeću ili nastavak sljedeće sjednice. Hvala.

Poslanik/zastupnik Mirsad Pindžo:

Hvala uvaženi predsjedavajući, pozdravljam sve prisutne one koje učestvuju u radu današnje sjednice i one koji prate rad današnje sjednice. Dvije stvari. Jedna je vezana za ovo što je kolega Kojović govorio, Prva radna sjednica Skupština Kantona Sarajevo nije utvrdila dnevni red samo je odgođen termin njenog početka i mi danas utvrđujemo dnevni red shodno Poslovniku 4 dana ranije Vlada i radna tijela i Kolegij imaju pravo za dopunu dnevnog reda. I tu nema ništa sporno. Ako bi moglo biti nešto sporno, samo to što biografije kandidata za ministre nisu došle 12 dana nego četiri dana ranije. A ja se nadam da kolegice i kolege zastupnici shvataju potrebu da to što prije okončamo da imenujemo Vladu jer puno je problema koji je čekaju da što prije počnemo raditi i da ćemo malo zažmuriti da se ovako izrazim, malo zažmuriti na tu povredu što nismo 12 dana dobili njihove biografije. Što se tiče inicijative, ove prve tačke dnevnog reda poslanička pitanja i inicijative, ja se ne slažem da se ta tačka skida ali obzirom da je ova današnja sjednica ujedno i svečarskog karaktera, ipak se imenuje Vlada Kantona Sarajevo ja predlažem da se samo rotiraju tačke. Da prva tačka bude Potvrđivanje Vlade Kantona Sarajevo a poslanička pitanja i inicijative ostavimo za zadnju tačku. Nema nikakvog razloga da mi odgađamo i da već danas zadužujemo Vladu Kantona Sarajevo sa određenim pitanjima i inicijativa i zaključcima kuda treba da ide. U tom smislu mi smo, obzirom da je DF ozbiljna politička stranka, mi smo u predizbornoj kampanji govorili da ćemo prije potvrđivanja Vlade Kantona neke zaključke ponuditi Skupštini na izjašnjavanje. Mi insistiramo da to bude danas ali nakon potvrđivanja Vlade, da ne zadužujemo staru Vladu koja više neće imati mogućnosti da radi, nego upravo onu koju danas budemo imenovali. Zato predlažem da samo izrotiramo tačke. Da prva bude Potvrđivanje odluke o imenovanju Vlade i daljim redoslijedom a zadnja tačka poslanička/zastupnička pitanja i inicijative. Hvala lijepo.

Poslanik/zastupnik Zvonko Marić:

Hvala predsjedavajući, pozdravljam sve kolege zastupnike, predstavnike medija, sve goste uz uvažavanje svih onih koji nas danas prate. Mislim da je obaveza ovoga parlamenta to vi već sami znate a samom tom činjenicom i vas koji ste najodgovorniji ljudi i rukovodite ovim parlamentom, jedna stvar koja se tiče, rekao bih pristojnosti da nakon, kako kolegica Segmedina Srna reče, tih šest mjeseci besmisla kojem smo prisustvovali date objašnjenje gledateljima ili odgovorite na pitanje zašto nakon šest mjeseci prva radna sjednica. Red bi bio, vi znate kao i ljudi iz sporta šta je fer plej. Fer bi bio od vas kao najodgovornijih ljudi koji rukovodite ovom skupštinom kažete ljudi oprostite građani, izvinite nismo bili u mogućnosti, nismo mogli, nismo imali sposobnosti da to uradimo ranije, ono što ste od nas očekivali. Obmanuli smo vas. Prema tome, napravili bi jedan korak, barem iskorak iz život blata u koji nas je dovela politika koja je radila na ovaj način. Ja mislim da vi niste smjeli nikako propustiti ovu priliku da uputite izvinjenje i ispriku građanima za ovo što nam servirate kroz sazivanje prve radne sjednice nakon šest mjeseci. Ja konkretno i moje kolege zastupnici iz SBB-a ne pristajemo da budemo taoci neke politike jer ja mogu da kažem ovdje slobodno ovdje u ovom Kanton Sarajevo niste imali ni SNSD niste imali ni Dodika, niste imali ni Čovića, niste imali HDZ i ne znam koji je razlog da mi statiramo šest mjeseci.

Predsjedavajući:

Gospodine Mariću hajde da skratimo stvarno svečana je sjednica.

Poslanik/zastupnik Zvonko Marić;

Ja ne bih da kvarim svečarski ton, gospodine nemojte da mi oduzimate riječ jer to nije korektno, držim se ovoga dnevnog reda, držim se i Poslovnika, prema tome, možda je vama neprijatno ali vjerujte mi za vas bi bilo dobro da definitivno kažete da ovdje u ovoj državi nije ništa normalno pa ni ovaj parlament koji želi da opravda ili da alibi za neku politiku koja se vodi izvan ovoga Kantona. Pa dajte molim vas, nisam završio i nemojte me prekidati zato što možda se neugodno osjećate ali ste trebali o tome misliti i ako je to nova politika, nove koalicije kakvu vi šaljete poruku zapravo građanima? Ja vas najozbiljnije upozoravam nije u tome rješenje da mi napustimo ovaj parlament ali je rješenje da vas upozorimo da radite ono što se radilo ranije. A ta nas je politika dovela ovdje gdje jesmo .

Poslanik/zastupnik Mirsad Pindžo replika:

Ja se izvinjavam. Gospodine predsjedavajući, ja vas molim da ovu sjednicu vodite u skladu sa Poslovníkom. Na dnevnom redu je utvrđivanje dnevnog reda današnjeg zasjedanja. Ova diskusija kolege Marića može ići kada bude rasprave o imenovanju Vlade Kantona Sarajevo a ne prilikom utvrđivanja dnevnog reda. Ja vas molim da poštuјemo svi zajedno Poslovnik i da radimo po onome što smo prihvatili kao normu kako ćemo raditi. Hvala lijepo.

Poslanik/zastupnik Zvonko Marić odgovor na repliku:

Gospodin Pindžo je govorio svojevremeno o nekom miješanju krušaka i jabuka i ja ovdje opet nisam ništa pomiješao, ali očigledno je on pomiješao. Ja govorim o obavezi vas i parlamenta a ne o Vladi. O Vladi ćemo govoriti kasnije. Prema tome, ta demagoška populistička priča kod mene ne prolazi, mislim ni kod onih koji uopće razumiju o čemu mi danas zapravo razgovaramo. Ja govorim o parlamentu o rukovodstvu Skupštine šta je trebalo da uradi, šta je elementarna pristojnost bila, a ne o Vladi. Mi ćemo se o Vladi izjasniti kasnije. To što on govori o rotacijama u okviru možda je on to navikao ali o rotacijama dnevnog reda i tačaka itd. to je, znate šta, to je jedna priča koja je demagoška i koja nije konstruktivna. Naprosto govoriti o tim rotacijama. Pustite vi tu priču. To je jako dobro poznata priča gospodine Pindžo i vi se molim vas pridržavajte poslovnika ako se već na njega pozivate. Mi govorimo trenutno o Skupštini i šta je bila obaveza ovog rukovodstva da kaže i obavezu prema ljudima koji su nas izabrali da predstavljamo njihove interese, jer u suprotnom, ovo znači da mi pristajemo na ucjenjivačku politiku koja nam se servira izvan ovog Kantona i molim vas ja znam šta vas pogađa, ja razumijem vašu stranku jer je u problemima jer je uzrokovala ove probleme u dobroj mjeri uz svog koalicionog partnera.

Predsjedavajući:

Hajmo samo voditi na vrijeme, isteklo je vrijeme. Imamo odgovor na repliku.

Poslanik/zastupnik Mirsad Pindžo:

Prvo kolega Mariću ja nisam vama uopšte replicirao nego pozvao predsjedavajućeg da vam oduzme riječ zato što kršite Poslovnik. A ovo što vi govorite je čista demagogija i ja nemam namjeru to slušati i nemam potrebu da se pravdam i ja samo tražim od predsjedavajućeg da meni i svim kolegama omogući da govorimo u okviru dnevnog reda. Upravo razgovaramo o utvrđivanju dnevnog reda i na tu temu možemo razgovarati kada dođu ostale tačke možemo pričati o njima. Prema tome ja bih vas zamolio da te fraze tipa demagoške, tipa krušaka i jabuka, tipa da je neko uvrijeđen ostavite za neku narednu tačku i da onda o tome razgovaramo. Hvala.

Predsjedavajući:

Hvala uvaženom zastupniku Pindži. Odgovor na repliku uvaženi zastupnik Marić. Ima zadnja replika. Nema pravo? Samo malo molim vas. Znači ima pravo. Uvaženi zastupnik Solaković se javio.

Poslanik/zastupnik Adnan Solaković:

Dobro je o voću i povrću nećemo diskutovati. Međutim iniciralo je ovdje populistički od gđina Pindže da je rekao da je njegova stranka ozbiljna stranka, kao što možemo vidjeti jeste ozbiljna, kao što možemo vidjeti pa je pet mjeseci hvalilo da dovedete ovdje nove ministre. Radi toga je bila reakcija. Prema tome ako ćemo ovdje o populizmu možemo ovdje govoriti do ujutro. Molim vas onda da se držimo svak svog reda. Hvala lijepo.

Poslanik/zastupnik Elmedin Konaković:

Poštovani predsjedavajući, dopredsjedavajući, vd sekretar Skupština Kantona Sarajevo, poštovane ministrice i ministri u Vladi Kantona, bivši ako bog da budući, poštovani gosti, gledaoci TVSA esselamu alejkum i dobro vam jutro. Ja ću kratko zaista po pitanju ovoga dijela u kom gospodin Kojović i ja nemamo isti stav po pitanju održavanja te i ove sjednice dvije sjednice o kojima je on govorio. Dakle problem na toj sjednici smo jedinstvenog stava bili što karakter hitnosti te sjednice nije uredio Kolegij. Ona se održala po kratkoj hitnoj proceduri bez da je kolegi utvrdio karakter hitnosti i zato sam onako blago iznenađen, to tako mogu reći, što ove dvije stvari se ne mogu komparirati, što se uopšte problematiziraju jer sam prošli put ja predložio da se onaj dio prijedloga kolege Kojovića da se može sazvati brza sjednica u roku od 48 sati kako bi na njoj imenovali Vladu ne izglasa, da to ne iskoristimo kao način za brzo formiranje Vlade, nego da ispoštujemo procedure. Mi danas ne počinjemo mimo procedura novi mandat nove Vlade, nego počinjemo po procedurama novi mandat nove Vlade. Poslovnik kaže 12 dana ranije, također član Poslovnika koji kaže da se mogu materijali slati 4 dana ranije. Shodno tome, mi smo održali i sjednicu Kolegija, ne telefonsku kao što su bile prakse, nego sjednicu Kolegija. Ne da bi smo samo obavijestili kada je nastavak, što također po Poslovniku koji to ne definiše je bilo moguće, nego da na Kolegiju svi politički subjekti utvrde datum održavanja sjednice i da barem četiri dana prije pošaljemo materijale. Tako da je sjednica sazvana po proceduri, razgovaramo o dnevnom redu. Ove druge navode neću i ne želim da komentarišem i nadam se da ćemo brzo glasati za ovaj dnevni red i ovu sjednicu održati. Nije ona samo svečarska. Imamo mi na njoj posla i u drugim tačkama vrlo ozbiljnog i nadam se da počinjemo kvalitetniji mandat nego što je bio protekle četiri godine. Hvala.

Poslanik/zastupnik Predrag Kojović:

Na neki način kolega Konaković je izgovorio ono što je moja namjera bila kada sam se javljao. Kolega Konakoviću ja sam, kao što kaže kolega Pindžo ja se potpuno slažem da trebamo ići dalje i da jedan dio ovih diskusija koje su se događale proteklih par minuta nije vezan za ovu tačku dnevnog reda. Ali smo razgovarali kolega Konakoviću i Pindžo da ne radimo ono što se događalo u prošlom mandatu gdje su stranke koje su bile na vlasti kršile Poslovnik i Zakon ponekad zato što nema vremena, zato što je nešto problematično i upravo iz tog razloga ja sam predlagao na prošloj sjednici da usvojimo tačku da izvršimo jednu izmjenu Poslovnika koja će vam omogućiti Vladi da saziva skupštinu na neki način prema svojoj potrebi. Tada se ovdje razvila diskusija o tome da li je taj član potreban, da li je nepotreban, znači ono što hoću da kažem, svaki put kada se nađem u ovakvoj situaciji ja ću insistirati da se onda promijene odredbe Poslovnika tako da možemo efikasno raditi po Poslovniku a ne da ga moramo kršiti da bi smo efikasno radili.

Poslanik/zastupnik Izudina Bajrović:

Hvala uvaženi predsjedavajući. Pozdravljam vas, dopredsjedavajućeg, kolege i kolegice zastupnike i zastupnice, ministre bivše i buduće, goste, gledaoce. Nije neobično da početak ove Skupštine klizi van dnevnog reda jer očito da se nameće kao najvažnije pitanje izbor ili potvrđivanje Vlade Kantona Sarajevo. Očito da tu znači imamo već nekih i poslovničkih propusta koji su možda iznuđeni, a koji su možda i namjerno izazvani, ja to ne znam vidjet

ćemo i da bi skratili čini mi se proceduru najbolje je da vi gospodine predsjedavajući stavite na glasanje prijedlog da se prva tačka dnevnog reda poslanička/zastupnička pitanja i inicijative koja se inače i zovu Vladin sat, a pošto još nemamo Vlade ne znam da li ima smisla imati vladin sat da stavite na glasanje da se ova tačka ili pomjeri da bude posljednja tačka dnevnog reda ili da se prolongira za narednu sjednicu. I mislim ukoliko to učinite da ćete učiniti ovaj rad efikasnijim. Hvala vam.

Poslanik/zastupnik Zvonko Marić:

Gospodine predsjedavajući, dakle vas i dopredsjedavajućeg ne trebam ovdje izlagati poštujem iz milion razloga, da ne argumentiram sve to. Međutim želim da vas doživljam na način na koji sam i do sada. Od vas očekujem kao od ljudi koji ste dali za ovu zemlju jako puno i da razumijete i našu dobru namjeru ne kao opozicija koja želi sada da ovdje nešto remeti. Ni na kraj pameti nam nije. Ali molim vas predsjedavajući nemojte da dozvolite da stvaramo atmosferu Pjong Janga jer ovaj određeni zastupnik koji traži od vas da mi oduzmete riječ kojem ne želim na ovoj sjednici više da poklonim ni jednu minutu dragocjenog vremena, govori o tome kako je prekršen Poslovnik ali eto 4 dana, 12 dana trebalo je dostaviti biografije da progledamo to kroz prste. Tu bi da progleda kroz prste ono gdje griješi gdje prekršen Poslovnik i priznaje a ovamo se poziva na odredbe Poslovnika. Pa gdje je tu logika. Pa nismo ovdje niko ovdje u ovom parlamentu nije od jučer znamo o čemu govorimo. I što se tiče gdina Kojovića i Konakovića, ja razumijem, i treba da radimo konstruktivno ali sam samo ukazao i gospodin Bajrović na ono što je trebalo uraditi, bio bi red, svim demokratskim postulatima. I ni na koji način. Pazite ne mora da vas obavezuju stavovi ni moji ni kolega iz poslaničke grupe SBB-a ali morate da vidite u kojoj ste situaciji, jer kako da rješavamo probleme ako ne sagledamo uzroke. Ja sam samo to govorio u kojoj teoriji na svijetu ima bez mogućnosti sagledavanja uzroka da se riješe problemi. Evo vi mi odgovorite, ima li to društvo? Ne postoji. Hvala vam lijepo.

Predsjedavajući:

Hvala uvaženom zastupniku Mariću. Pošto nema više niko za riječ zaključujem raspravu, i sada imamo znači dnevni red koji je danas predložen ćemo glasati za njega s tim što ćemo samo prvu tačku da prebacimo da bude zadnja tačka dnevnog reda.

Molim uvažene zastupnike da se izjasne o ovom dnevnom redu. Ko je za?

Pošto je ovo usvojeno znači nema potrebe da glasamo za neki drugi prijedlog. Sada ću vam pročitati dnevni red koji je usvojen.

1. Prijedlog odluke o potvrđivanju Vlade Kantona Sarajevo
2. Prijedlog odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
3. Prijedlog odluke o imenovanju predsjednika, zamjenika predsjednika i članova Odbora za javna priznanja Kantona Sarajevo
4. Prijedlog odluke o imenovanju zamjenika pravobranioca Pravobranilaštva Kantona Sarajevo;
5. Poslanička/zastupnička pitanja i inicijative

KONSTATUJEM DA JE SKUPŠTINA ZA PRVU RADNU SJEDNICU SKUPŠTINE KANTONA SARAJEVO USVOJILA DNEVNI RED, KAKO JE I PREDLOŽEN. HVALA.

U prilogu obavijesti za održavanje današnje sjednice dostavljeni su vam zapisnici sa stenogramima Konstituirajuće i Prve hitne sjednice Skupštine Kantona Sarajevo.

Zbog tehničkih nedostataka Služba za skupštinske poslove je povukla dostavljene zapisnike, te se stoga o njima nećemo danas izjašnjavati.

Nakon otklanjanja nedostataka isti će biti ponovo upućeni u skupštinsku proceduru.

Dužan sam vas obavijestiti da sam jutros dobio obavijest od zastupnika Amela Mekića, Hameda Aljovića i Nermina Bjelaka kojim nas obavještavaju da će u Skupštini Kantona Sarajevo od 23.03.2015.godine djelovati kao samostalni zastupnici. Također je stigla obavijest da zastupnici političke stranke BOSS i samostalni zastupnik Nermin Bjelak formiraju Klub pod nazivom Klub zastupnika BOSS i samostalni zastupnik Nermin Bjelak. Predsjednik Kluba je Haris Pleho. Hvala.

AD-1.

PRIJEDLOG ODLUKE O POTVRĐIVANJU VLADE KANTONA SARAJEVO

Prijedlog navedene Odluke i biografije kandidata dobili ste u dopunskom materijalu za sjednicu.

Zbog javnosti i zbog gostiju podsjetio bih vas da sam po prijedlogu Kluba zastupnika SDA, a na osnovu člana 203. stav 2. Poslovnika Skupštine Kantona, uz konsultaciju sa dopredsjedavajućim, donio Odluku o imenovanju kandidata za mjesto premijera Kantona Sarajevo gđina Elmedina Konakovića, dana 23.02.2015.godine.

Kandidat za mjesto premijera Kantona Sarajevo u skladu sa članom 204. stav 1. Poslovnika Skupštine Kantona Sarajevo dostavlja predsjedavajućem Skupštine prijedloge kandidata za ministre.

Gospodin Elmedin Konaković je navedene prijedloge dostavio 18.03.2015.godine, i iste sam proslijedio Komisiji za izbor i imenovanje i administrativna pitanja Skupštine Kantona, koja utvrđuje prijedlog odluke o potvrđivanju Vlade Kantona Sarajevo.

Komisija za izbor i imenovanje i administrativna pitanja je na svojoj sjednici od 19.03.2015.godine utvrdila Prijedlog odluke o potvrđivanju Vlade Kantona Sarajevo.

Ja bih sada zamolio kandidata za premijera Kantona Sarajevo, gospodina Elmedina Konakovića, da se obrati ovoj Skupštini, iznese svoj Ekspoze i ukratko predstavi buduće ministre i ministrice u Vladi Kantona Sarajevo.

Kandidat za premijera Elmedin Konaković: izlaže Ekspoze

Poštovani još jednom predsjedavajući, poštovani dopredsjedavajući, služba Skupštine Kantona Sarajevo, poštovane kolegice i kolege zastupnici, poštovane ministrice i ministri u Vladi bivši i budući ako Bog da, poštovani gosti cijenjeni gledaoci TVSA, esselamu alejkum i dobro vam jutro, još jednom. Nekoliko rečenica definicije opšteg stanja na početku i prijedlozima rješenja i mjera u nastavku.

Stanje u kojem se nalazi Kanton Sarajevo ne možemo nazvati zadovoljavajućim. Izgubljeno povjerenje u ljude koji vode procese, bave se politikom, korupcija, kriminal, nepotizam su osnovni problemi ovog društva. Visoka stopa nezaposlenosti posebno mladih, obrazovanih ljudi, nagomilani problemi u sferi komunalne privrede, redukcije vođe, stalna opasnost od obustave isporuke gasa,

javnog gradskog prevoza, problemi pasa lutilica, nedefinisan odnos ekonomske cijene pružanja usluga i subvencija po određenim pravima, tužbe po kolektivnim ugovorima, i ostale tužbe kao velika opasnost za ekonomsku stabilnost Kantona, sigurnosni sistem koji od pronalaska počinitelja krivičnih djela do njihovog procesuiranja i kažnjavanja ne zadovoljava standarde za potreban život građana, posebno neefikasan sistem u borbi protiv privrednog kriminala i korupcije u javnoj upravi. Siva ekonomija, crno tržište rada, nelegalne konkurencije, nedovoljan broj malih i srednjih preduzeća u odnosu na europske standarde, ne postojanje jasne vizije za razvoj Sarajeva kao turističke destinacije sa svojim geografskim, historijskim i prednostima prirodnih resursa, posebno razvoja zimskog turizma. Spora administracija u segmentu podrške projektima, investicijama kao i pokretanju novih poslovnih subjekata, neadekvatan status boračke populacije, šehidskih porodica, uskraćivanje zakonom garantovanih prava, sistem pružanja zdravstvenih usluga, nedefinirane funkcije ustanova u primarnoj, sekundarnoj i tercijarnoj zdravstvenoj zaštiti, nedefiniran status privatnih ustanova u zdravstvu, skupa Esencijalna lista lijekova, prava koja konzumiraju i građani koji ne žive u Kanton Sarajevo, nedostatak osnovnih sredstava za rad u zdravstvenim ustanovama, a istovremeno nabavka skupih aparata koje skoro i ne koristimo. Nepotpuna integracija UNSA, nejasan ekonomski status, loš status dijela profesora i asistenata na UNSA, neusklađena upisna politika sa potrebama tržišta rada, status nastavnika, profesora i direktora u osnovnim školama i srednjim školama, tužbe, dugovanja za javne nabave, sopstveni prihod. Nejasan status Prosvjetno pedagoškog zavoda, obimni nastavni programi, posebno kod osnovaca, nedovoljna zaštita penzionera, ne postojanje projekata za lakše i zdravo starenje, akumulirani deficit iz prethodnih godina, dugovi preduzeća čiji je osnivač Kanton, Zakon o raspodjeli javnih prihoda FBiH, tendencija smanjivanja prihoda koji se vraćaju Sarajevu koje eskalira zahtjevima za ukidanje Pondera 2. nejasne nadležnosti u dijelu presude Ustavnog suda BiH u donošenju zakona o lokalnoj samoupravi su detektovani najveći problemi ovog društva i naš zadatak je borba primarno protiv ovih navedenih problema. Nakon analize i detektovanja najvećih problema, zadatak Vlade Kantona Sarajevo je da u aktuelnom trenutku, koristeći sva raspoloživa sredstva, šanse i resurse Kantona, zaustavi eroziju i pokrene pozitivne procese u dijelu privrede, posebno njenih nekoliko grana: turizmu, metalnoj industriji i IT sektoru. U ova tri segmenta pokazatelji kažu da su jedini dio ovoj privrednog ambijenta koji na godišnjem nivou u Kanton Sarajevo bilježi porast u zapošljavanju i bruto društvenom dohotku, BDP. U nastavku će kroz ministarstva, prijedlogom posebnih mjera definisati egzaktne procese i prioritete. Također jedan od bitnih segmenata i prioriteta Vlade bit će zaštita domaćih kompanija, domaćih proizvoda, ambijenta za njihov razvoj i pozicioniranje, kao i olakšavanje plasmana njihovih proizvoda. Prije nego pređemo na prijedloge mjera po ministarstvima, napraviti će još jednom bitan osvrt na politički dio ambijenta, kao pretpostavku za stabilnost Kantona. Očekuje nas rasprava o tom famoznom Zakonu o raspodjeli javnog prihoda na nivou FBiH i bitno je da svi zajedno kao što smo to uradili na hitnoj sjednici Skupština Kantona Sarajevo nastavimo proces koji je ovaj Zakon dovesti u realne okvire sa parametrima koji se u cijelom svijetu koriste. Ne smijemo dozvoliti da Sarajevo koji na jedinstven račun Trezora uplaćuje ¼ sredstava, cca 1,3 milijarde maraka, u raspodjeli dobije nazad samo 5% od ukupne sume, cca 220 miliona KM. Po bilo kojem parametru. Ovaj primjer zajedničkog djelovanja svih političkih subjekata u Kantonu, svih zastupnika u kantonalnoj Skupštini, jedinstvenog stava graditi ćemo i u drugim, za Kanton bitnim procesima. Pozivamo i poziciju i opoziciju da kvalitetnim prijedlozima popravljamo stanje u društvu a naše političke animozitete ostavimo po strani. Vlada će biti jednako otvorena prema svim političkim subjektima i zastupnicima kao što će bez razlike zaustavljati sve negativne procese bez obzira ko ih vodi, stranačke kolege ili pak neko drugi. Od nas se očekuje da prekinemo praksu političkih prepucavanja, i ličnih interesa jer ništa dobrog nisu donijeli građanima Kantona, FBiH i države nam BiH. Pozitivne poruke koje je naša zemlja napokon dobila iz Brisela pružena ruka EU, Sporazum o stabilizaciji i pridruživanju još su jedan pozitivan aspekt i mogućnost da koristeći tu priliku ekonomiju naše zemlje pokrenemo u pozitivnom pravcu. Nekoliko će samo prednosti ovog Sporazuma o stabilizaciji i pridruživanju za koji postoji najava da bi u junu već mogao biti na snazi. Približavanje standarda EU za kvalitet proizvoda, što će dovesti do veće konkurentnosti bh proizvoda i privatnog sektora. Postepeno

uvođenje viših standarda zaštite potrošača što će dovesti do povećane sigurnosti bh potrošača. Veća konkurentnost na tržištu što će potencijalno dovesti do snižavanja cijena i većeg izbora roba i usluga za građane BiH. Bolje predvidivo poslovno okruženje zbog postepenog približavanja EU zakonima i standardima što će dovesti do veće sigurnosti i povjerenja za i domaće i strane ulagače, veća učinkovitost institucija, više napretka na glavnim pitanjima kao što je smanjenje stope zločina i korupcije promovisanje reforme visokog obrazovanja, razvoj demokracije i ljudskih prava. Promovisanje nezavisnosti medija, unapređenje transportne infrastrukture. Osim političkih subjekata, potpuno otvoren kanal komunikacije ostvarit ćemo sa građanima Kantona Sarajevo, posebno sa sindikatima koji su sastavni dio sistema i od kojih očekujemo puno razumijevanje za proces. Zajednički i objektivan pristup rješavanju problema, svjesni činjenice da nas lični i isključivi interesi mogu dovesti u situaciju koje nemaju pozitivan epilog ni za jednu stranu ako se možemo nazvati stranom. Početak priče o pozitivnim reformama mora krenuti iz Vlade Kantona Sarajevo ličnim primjerima, premijera i resornih ministara u dijelu racionalizacije, ušteda, transparentnosti u radu. Naši imovinski kartoni, porijeklo imovine, ostale informacije koje govore o kredibilitetu koji je potreban za vođenje reformskih procesa, treba da budu u svakom trenutku dostupni javnosti. Dakle, pravda, beskompromisna borba protiv korupcije i kriminala, transparentnost, objektivan pristup rješavanju problema, javni interes i interes građana prije ličnih i stranačkih interesa, procesi koji proizvode nove vrijednosti, ključne su riječi ovog Ekspozea i opšte smjernice za rad Vlade Kantona Sarajevo u narednom mandatu.

Opšte mjere po ministarstvima. Prijedlozi mjera, opštih mjera i mjera po ministarstvima.

Neophodno je napraviti potpunu reformu u dijelu korištenja budžetskih sredstava jer činjenica da su budžetski korisnici skoro pa postali sami sebi svrha. Povećati nadzor i nastaviti racionalizaciju korištenja budžetskih sredstava, izvršiti analizu racionalnosti i opravdanosti tekućih transfera, donijeti Zakon o konsolidaciji komunalne privrede, izvršiti analizu racionalnosti i opravdanosti ugovorenih i drugih posebnih usluga, reducirati broj uposlenih u skladu sa standardima i normativima. Donijeti zakone o materijalnom i finansijskom poslovanju za obrazovanje i kulture, hitna izmjena kolektivnih ugovora i usaglašavanje sa tim zakonima, trezorskim poslovanjem obuhvatiti sve budžetske korisnike. Razvojem privrednih aktivnosti povećanjem zaposlenosti i efikasnijom naplatom javnih prihoda, doći do stabilnog razvojnog budžeta. Uštede na svim stavkama, reprezentacija, vozni park, reorganizacija, telefoni, službena putovanja. Integracija javnih nabavki bit će jedan proces koji ćemo voditi u svim ministarstvima. Integracija javnih ustanova bit će proces koji ćemo voditi u svim ministarstvima, ukidanje naknada za poslove koji se obavljaju u toku radnog vremena, osim možda nekoliko specifičnih. Vladine i skupštinske komisije za kontrolu javne potrošnje, reformskih procesa i utroška sredstava, mjere za stimulaciju rasta poreza koji pripadaju Kantona Sarajevo, porez na dobit, imovinu i dohodak. Kontrola neporeznih prihoda sudske i administrativne takse, namjenski prihodi i naknade za šume, vode, okoliš, pretvaranje zemljišta, parkirališta, civilne zaštite.

Sada prelazimo na prijedlog mjera, ustvari preskočit ćemo ovaj dio detaljno postoji prijedlog mjera usvojen od strane Federalne Vlade, dakle ozbiljnih reformskih procesa. Ja na računaru imam skoro pa Ekspoze, nismo ga još čuli, od federalnog premijera, ali onaj dio sam apostrofirao i boldirao koji ima direktan interes i povezan je sa implementacijom onog dijela koji se tiče Kantona, a to je možda $\frac{3}{4}$ tih. Veći dio smo obuhvatili prijedlozima naših mjera a zbog poštovanja i vašeg vremena, taj moj Ekspoze bi bio predug možda duži od viših nivoa, što ne bi bilo možda ni politički korektno pa ću taj dio preskočiti. Ovaj dokument će vrlo brzo nakon što se lektoriše, ja nisam lektor, biti na stranici Kantona Sarajevo, Vlade Kantona Sarajevo, dostupan i medijima i javnosti, iz njega ćete moći analizirati sve ono što smo mi kao mjere najavili za narednih nekoliko dana naša javnost dobit će taj dokument. U implementaciji ovih i drugih mjera postoje alati za upravljanje sistemom za koji mislim da nisu dovoljno iskorišteni. Dakle, država kao organ koji upravlja svim procesima, nabrojat ću alate za upravljanje sistemom: uprava za indirektno oporezivanje, Sektor za poreze Uprave za indirektno oporezivanje, Odsjek za reviziju i kontrolu, Odsjek za kontrolu velikih poreznih obveznika, Porezna uprava FBIH, Sektor za inspeksijski nadzor, obavještenje istrage, Kantonalne

uprava za inspeksijske poslove, inspektorati, poljoprivredne, vodne i šumarske inspekcije, veterinarske inspekcije, urbanističko građevinske, ekološke i komunalne i tehnološke inspekcije, tržno turističke inspekcije, inspekcije rada i zaštite na radu, socijalne zaštite, sanitarne, zdravstvene te farmaceutske inspekcije, saobraćajne, cestovne inspekcije i drugo. Budžetska inspekcija Kantona Sarajevo, institucije koje se bave istragama, Finansijska inspekcija, SIPA, OSA i Granična policija. Alati su koji ni izbliza nisu iskorišteni na način koji bi trebao doprinijeti analizi, prijedlozima i rješenju mjera i ove i ostalih Vlada u BIH.

Nakon što smo se osvrnuli na prijedloge ovih mjera i strateške ciljeve preći ćemo na prijedloge mjera po ministarstvima.

Prvo Ministarstvo obrazovanja, nauke i mladih. Na jednom od sastanaka neformalnih sa nevladinim dijelom sektora u BIH nekoliko nas zastupnika, i ja prvi put čini mi se čuli smo informaciju da u najuređenijem europskom sistemu u državi Finskoj najveće plate u sistemu imaju nastavnici u osnovom i srednjem obrazovanju što govori da onaj sistem koji je uspio riješiti svoje probleme apostrofira kao najbitniji dio razvoja jedne države ljude koji našu djecu uče, odgajaju i pripremaju za poslove koji ih kasnije čekaju. Nisam pravio kategorizaciju ministarstava po važnosti jer je teško napraviti razliku između statusa šehidskih porodica i potrebe da investirate novac za neki kapitalni projekat. To danas jeste umijeće bavljenja politikom, ali sam ovo Ministarstvo stavio na broj jedan zašto što je to polazni osnov za uređenje sistema. Edukaciju onih koji treba da uređuju sistem. Kao što smo u ocjenama opšteg stanja konstatovali da status nastavnika, profesora, direktora u obrazovanju nije na nivou na kom se nalaze njihove kolege u razvijenim europskim razvijenim zemljama, fokus će biti na poboljšanju statusa, uslova za rad a sve u svrhu što kvalitetnijeg obrazovanja za naše učenike i studente. U predškolskom, osnovnom i srednjem obrazovanju, povećati broj djece uključene u predškolsko obrazovanje, unaprijediti efikasnost i kvalificiranost za rad sa predškolskim uzrastom. Izvršiti reformu udžbeničke politike po modelu jedan predmet jedan udžbenik. Kreiranje upisne politike s tržištem rada, izmjena zakona o srednjem obrazovanju kako bi se omogućila implementacija državne mature i njena primjena u školskoj 2016/17. revizija svih podzakonskih akata koji tretiraju osnovno i srednje obrazovanje, rješavanje problema tužbi uposlenika u obrazovanju prema kantonu zbog kršenja Kolektivnog ugovora, te zaustavljanje daljeg utuživanja donošenjem adekvatnih zakonskih propisa. Stvaranje optimalnih uslova za školovanje djece sa poteškoćama u razvoju, stvaranje zakonske i stručne pretpostavke za rad Prosvjetno – pedagoškog zavoda kao nosioca implementacije programskih ciljeva, realizacije reformi zajedno sa ministarstvom. Omogućiti pojačan nadzor i brigu o zdravlju djece u predškolskim i školskim ustanovama u saradnji sa ministarstvom zdravstva, uvesti treći sat fizičkog vaspitanja i tjelesnog odgoja. Visoko obrazovanje i nauka sa studentima kao našim primarnim interesom i zakonom o standardu kao početnim aktom u radu ove Vlade. Usvajanjem zakonske regulative koja će obezbijediti jedinstvenu upisnu politiku visokoškolskim ustanova u skladu sa državnom maturom u srednjim školama. Usaglašenu sa potrebama tržišta rada sa ciljem sprječavanja hiperprodukcije kadrova. U ovim prvim dijelovima Ekspozea govoreći o mjerama ja često ulazim u nadležnosti onih ministarstva koja čitam kasnije pa je taj obim njihovih mjera manji. Kada govorite o usaglašavanju tržišne i upisne politike to se naravno odnosi na nekoliko ministarstava. Prije svega na Ministarstvo rada, socijalne politike i Zavoda za zapošljavanje, tako da te mjere neću čitati dva puta. Omogućiti akreditiranje studijskih programa UNSA, doktorskih studija u skladu sa najboljim europskim standardima i iskustvima a sve u cilju zadržavanja leaderske pozicije UNSA. Ali i njegovom napredovanju na ljestvici svjetskih univerziteta. Obezbijediti punu akademsku autonomiju UNSA, a istovremeno u potpunosti završiti proces integracije u njegovom ekonomskom dijelu. Osnivanje fonda za nauku u Kanton Sarajevo u cilju dugoročnog rješavanja problema finansiranja nauke u Kanton Sarajevo, naučnih projekata i doktorskih studija dobitnicima Zlatne znače UNSA. Poveziavanje nauke sa privredom, nastavno naučni programi koji prate nekoliko segmenata razvoja Kantona Sarajevo poseban akcenat na turizam, IT Sektor i edukaciju pisanja projekata za pristup IPA fondovima. Ministarstvo finansija: izvršiti analizu i dopunu svih zakona i podzakonskih akata, kojim su regulisana parafiskalna opterećenja. Zakon o taksama, komunalnim, administrativnim, i o

sudskim taksama. Sanacija i konsolidacija budžeta, smanjenje troškova voznog parka, na osnovu dostupnih analiza na nivou BIH očekivani rast nominalnog bruto domaćeg proizvoda u 2015 godini je 2,5%. Kada se takav nominalni rast koriguje stopom inflacije koja će prema očekivanjima iznositi do 1% u 2015 godini, proizilazi da će se u BIH u ovoj godini dogoditi blagi realni ekonomski rast u iznosu od oko 1,5 do 2%. U tom smislu i dalje se očekuje da Kanton Sarajevo u ukupnom BDP Federacije BIH učestvuje sa iznosom od preko 6 milijardi KM, odnosno više od 1/3 od gotovo 20% BDP-a posmatrano na nivou BIH prema podacima iz ranijih godina. Prema dostupnim pokazateljima i projekcijama na nivou FBiH i BIH projekcija trendova makro ekonomskih pokazatelja u širem okruženju, prvenstveno EU očekuje se da funkcionisanje svih nivoa vlasti, uključujući i Kanton Sarajevo, ograničenim budžetskim okvirima projicirani rast lične potrošnje koja u najvećoj mjeri utječe na domaću potražnju, a u FBiH za 2015 godinu iznosi nedovoljnih 1%. Obzirom na blagi očekivani rast BDP-a u narednom periodu jedan od glavnih zadataka Ministarstva finansija će biti održavanje stabilnosti finansijskog sistema i poštivanje budžetske ravnoteže. Preduslov za ostvaranje tog zadatka je racionaliziranje javne potrošnje i kod svih budžetskih korisnika. S tim u vezi insistirat će se na tome da budžetski zahtjevi od strane budžetskih korisnika budu detaljno obrazloženi kako bi se nadležno Ministarstvo i Vlada mogli odrediti prema njima te efikasno rasporediti ograničena budžetska sredstva. Samo efikasno upravljanje i efektna javna potrošnja će omogućiti u kratkom roku kontrolu akumuliranog deficita, stabilnost ukupnog javnog duga, te poboljšanje tih parametara u srednjem toku. Ja sam ovaj Ekspoze radio najvećim dijelom sam uz konsultaciju sa svojim kolegama i kolegicama koji su svi ponaosob poslali kratki siže onoga što vide kao prioritete i dio ovog ekspozea je i dio stavova mojih budućih ako Bog da kolega iz Vlade, tako da sam te dokumente objedinio. Koristio sam također i podatke Privredne komore i SERDE koji rade vrlo kvalitetnu analizu stanja posebno u dijelu privrede, razvoja malih i srednjih preduzeća i problema u realnom sektoru u privredi.

Ministarstvo zdravstva zdravstveni sistem u Kanton Sarajevo organiziran je u 13 zdravstvenih ustanova po mom ličnom mišljenju preglomazan i preobiman sa 13 JU. Kantonalnim ministarstvom zdravstva, ZZO Kanton Sarajevo sa sedam komisija i timova, plus UO: ZZO finansira rad navedenih ustanova sa cca 350 miliona KM na godišnjem nivou. S obzirom na izrazito visoke troškove i koštanje Esencijalnih lista smatram da bi trebalo provesti duboku reformu zdravstvenog sistema u cilju većeg zadovoljstva bolesnika ali i zdravstvenih uposlenika. Potrebno je utvrditi tačan broj uposlenika, njihove profule, koliko ima ljekara koje specijalnosti, i subspecijalnost. Koliko ima medicinskih tehničara i njihove stručne profiliranosti. Koliko i kojeg nemedicinskog kadra paralelno snimiti prostor i opremu kojom raspolažu zakonski utvrditi radno vrijeme svake zdravstvene ustanove. U procesu racionalizacije izvršiti spajanje, tj fuziju zdravstvenih ustanova koje su kompatibilne u smislu zdravstvenog funkcionisanja. Na UO i NO ovih 13 ustanova godišnje se troši cca 2,5 miliona KM i fuzijom bi se poboljšao kvalitet zdravstvene usluge, pojednostavio put pacijenta, smanjili troškovi, smanjili troškovi za upravu i režije, otvorila mogućnost da oslobođeni prostori budu ekonomski isplativi i budu izvor novih prihoda. Bilo bi neophodno raditi na centralnom registru bolesti koji bi dao tačne podatke o oboljevanju populacije u Kanton Sarajevo time bi bilo omogućeno razraditi programe prevencije najčešćih bolesti. Ginekološki karcinomi, karcinom dojke, karcinom prostate, rektalni karcinom, karcinom želuca i karcinom pluća. U skladu sa navedenim trebalo bi uraditi projekte edukacije zdravstvenog kadra usmjeravanja za specijalizacije. Izvršiti reviziju Esencijalne liste lijekova u potpunosti preći na generičke nazive, za hronične bolesti nabavljati i dijeliti lijekove koji ne moraju biti u originalnoj ambalaži. Skupi su i izdavati tačno određenu količinu koja je propisana od ljekara. Sve praćeno bar kodom. Sa ovih nekoliko prijedloga može se napraviti velika ušteda u postojećem stanju, time bi omogućili oslobađanje materijalnih sredstava, koja bi mogla biti iskorištena za kvalitetniju edukaciju osoblja, adekvatno održavanje nabavku postojeće nove opreme za rad kao i plaćanje zdravstvenih radnika. Izvršiti konsolidaciju područja medicine rada nakon analize, primjene jedinstvene metodologije kojom se brže utvrđuju mjerila za zaključivanje ugovora između ZZO i javnih ustanova. Uspostava sanacijskih programa za zdravstvene ustanove koje se nalaze u gubicima. Definisanje statusa

privatnog sektora u zdravstvu unapređenje onog dijela u kojem postoje duge liste čekanja. Akcenat na područje medicinske dijagnostike. Definirati status ljekara koji rade u oba ova sektora. Poboljšanje sistema upućivanja između primarnog, sekundarnog i tercijarnog nivoa, donošenja master plana razvoja bolničke zdravstvene zaštite u Kanton Sarajevo. Prestanak izdvajanja sredstava za kapitalne investicije u zdravstvu i ZZO Kantona Sarajevo prije nego riješimo sve ove nagomilane probleme. I još jedan poseban akcenat na status KCUS koji je projekat započet, ne mogu reći ni da smo blizu završetka nego je samo započet.

Ministarstvo komunalne privrede i infrastrukture. U oblasti komunalne djelatnosti i komunalne privrede i infrastrukture gdje sa danom imenovanja ove Vlade počinje egzistirati novo Ministarstvo i to Ministarstvo komunalne privrede, infrastrukture možemo konstatovati da stanje, blago rečeno, nije na zadovoljavajućem nivou. Čak šta više možemo reći da je stanje alarmantno jer u u pojedinim oblastima je dovedeno u pitanje obavljanje nekih od komunalnih djelatnosti koje predstavljaju osnov za normalno funkcionisanje i odvijanje života građana i privrednih subjekata na području Kantona Sarajevo. Zbog teškog finansijskog stanja u dijelu koji se odnosi na snabdijevanje prirodnim gasom i snabdijevanjem toplotne energije kao jedno od prioriternih pitanja ove Vlade, bit će rješavanje pitanja dugovanja koja postoje od strane Toplana prema Sarajevo gasu i rješavanje pitanje dugovanja Sarajevo gasa prema BH gasa za isporučeni prirodni gas. Rješavanjem ovog pitanja znači da je konačno potrebno krenuti u rješavanje modela finansijskog poslovanja KJKP na ekonomskoj i socijalnoj osnovi. Ekonomska cijena i bolja socijalna skrb i briga onih kojima je to potrebno također su jedan od akcenata. Dakle plaćat će i grijanje i vodu i sve ostale komunalne usluge svi koji su u prilici da ih plaćaju, a subvenirati ćemo sve koji su u socijalnoj potrebi kroz drugo resorno Ministarstvo za rad i socijalnu politiku. Kao sljedeće mjere u cilju sanacija narušenog stanja u navedenim preduzećima pa i ostalim preduzećima koja su iskazala gubitak u poslovanju zbog utvrđivanja niže cijene koštanja u odnosu na stvarnu cijenu koštanja donijeti propis kojim će se predvidjeti način sanacije konsolidacije komunalnih preduzeća s ciljem stvaranja komunalne privrede, stavljanja komunalne privrede na zdrave osnove i omogućavanje komunalnim preduzećima da nesmetano pružaju komunalnu uslugu kranjem korisniku. Imamo nekoliko započetih kapitalnih projekata u ovom Ministarstvu jedan od njih su Butile rekonstrukcija i obnova tog prečistača trebao bi biti pušten u funkciju krajem 2015 odnosno početkom 2016 godine. Jedan o prioriternih kapitalnih projekata u ovom Ministarstvu treba biti izgradnja rekonstrukcija vodovodne i kanalizacione mreže što znači promptno započeti novu proceduru i pregovore sa EBRD-om ili nekom sličnom institucijom radi obezbjeđivanja povoljnih kreditnih aranžmana iz kojih će se vršiti sanacija i rekonstrukcija vodovodne i kanalizacione mreže sa ciljem smanjenja velikog gubitka vode u oštećenoj postojećoj mreži koji iznosi cca 70%. Sanacija i rekonstrukcija vodovodne mreže podrazumijevat će i zamjenu postojećih azbestnih cijevi sa cijevima koje su ekološki prihvatljive. Imperativ glavnog grada samim tim Kantona Sarajevo u kom su smještene najvažnije domaće i strane državne institucije jeste da mora biti čist i uredan, te će se s tim u vezi putem KJKP raditi na daljem uređenju i modernizaciji gradske deponije otpada novim tehnologijama, prikupljanje i odvoz otpada uz najveći stepen reciklaže istog. Upotreba svih raspoloživih sredstava uz primjenu efikasnih mjera i sankcija za krivce stvaranja divljih deponija. Obnova tehničkih sredstava za održavanje čistoće na ulicama i trgovima. Poboljšanje održavanja javnih površina i revitaliziranje urbanog zelenila. Povećanje stepena i efikasnosti humanog rješavanja zbrinjavanja pasa lualica. Kada je u pitanju javna rasvjeta na području Kantona Sarajevo tu su također procesi koje pokušavamo rješavati sa naprednim tehnologijama iz IT sektora, povezana sa rješenjima u privredi. I malo je obiman ovaj dio opisa njega ću ovdje preskočiti. U prvoj godini mandata ove Vlade neophodno je obezbjediti sredstava u budžetu Kantona Sarajevo za otkup zemljišta za proširenje groblja koja su nadležnosti KJKP Pokop, prvenstveno groblja Vlakovo obzirom da se kapaciteti brojnih mjesta rapidno smanjuju. U ovom segmentu je potrebno obezbjediti sredstva za održavanje i uređenje otklupljenih parcela i njihovo stavljanje u funkciju sahranjivanja umrlih osoba. Finansijska revizija učinka u svim preduzećima kontrola poslovanja preduzeća od strane nadležnih institucija, to je dio ovog zaključka koji ćemo nadam se usvojiti a dogovor je političkih subjekata SDA i DF-a da će prije početka rada

ove Vlade sve nadležne institucije biti pozvane ili poslone da u svim JKP i JU naprave adekvatnu analizu, reviziju poslovanju i izvijeste o tome skupštinu i Vladu Kantona Sarajevo. Zakon o finansijskoj konsolidaciji, korporativno restrukturiranje JKP, od strane neovisnog subjekta, utvrđivanje i uspostava kontrole tarifnih politika, ekonomske cijene usluge uz subvenciju svim socijalnim kategorijama, objedinjeno fakturisanje i naplata komunalnih usluga putem jedinstvenih centara za kupce su jedna od ozbiljnih ideja uz koju ćemo tražiti podršku federalne Vlade da pokušamo riješiti onaj dio neplatiša ili neplaćenih računa, ogromne su cifre u Kanton Sarajevo.

Ministarstvo prostornog uređenja građenja i zaštite okoliša

Strategija budućeg rada resornog ministarstva prostornog uređenja u ovom trenutku je u stvari vizija budućeg rada a sačinjena na osnovu uvida u izvještaj o radu ministarstva stambene politike i dijela ministarstva prostornog uređenja i zaštite okoliša za 2014 godinu. Program rada ovih ministarstava za 2015 godinu kao i dijela dokumenata o finansijskom stanju i planu od kojih je najznačajniji dokument Okvirnog budžeta 2014-2017. program javnih investicija 2014-2017, te izvještaj o izvršenoj prethodnoj reviziji sa zaključcima Vlade po istom. Pored navedenih dokumenata pogled na budući rad uključena su lična viđenja i promišljanja u ovoj oblasti a stečeno u prethodnom periodu. Vlada u prethodnom mandatu mandatom periodu je pokrenula čitav niz aktivnosti i projekata kao i donijela niz odluka i zaključaka u vezi propisa iz svoje nadležnosti. Što je stvorilo povoljnu situaciju za dalji rad u ovom resoru. Ovakva situacija ukazuje da će očuvanje ovih trendova biti već značajan uspjeh u narednom periodu. Osnovni cilj u djelovanju ovog ministarstva treba da bude stvaranje uvjeta i povoljnog ambijenta za rješavanje zahtjeva i potreba građana Kantona Sarajevo u oblasti prostornog planiranja stambene politike i zaštite okoliša. Pored ovoga intenzivirati rad na donošenju razvojne prostorno planske dokumentacije što se odnosi na Prostorni plan i Urbanistički plan Sarajeva, razvoj prije svega bi bio u podršci novoj kolektivnoj stambenoj izgradnji u cilju što povoljnijeg ambijenta za rješavanje stambenih problema svih građana Kantona Sarajevo kao i realizacija novih predloženih i usvojenih projekata te predlaganje i drugih projekata koji će nastati kao rezultat detaljne inventarizacija unutar samog ministarstva i sagledavanja zahtjeva i potreba građana. Najznačajnija aktivnost u okviru zaštite okoliša odnosit će se na razvoj povećanja energetske efikasnosti što je projekat od višestrukog značaja kako u svijetu tako i za nas u kantonu. Pristupit ćemo izmjenama Zakona o prostornom uređenju Kantona Sarajevo kao i donošenju zakona o premjeru i registraciji nekretnina te po potrebi izmjenama prostorno planskih dokumenata na nivou Kantona Sarajevo te umanjenjem naknada i uvođenjem pogodnosti pri plaćanju istih. Poboljšati uvjete i stimulirati investitore za nova ulaganja i otvaranje novih radnih mjesta. Uspostaviti fond za zaštitu okoliša, energetska efikasnost a u cilju efikasnije racionalnije realizacije projekata iz oblasti zaštite okoliša. Uspostavljanje mehanizma i sredstva za povećanje energetske efikasnosti te potpune osposobljenosti za apliciranje na međunarodne fondove. Ministarstvo privrede kao najofanzivniji dio ove cijele Vlade je nekoliko segmenata rada Vlade i ministarstava Vlade su isključivo defanzivni baveći se problemima zaustavljanja erozije odgovora na loš status radnika, nagomilane tužbe, na razgovore i pregovore sa sindikatima što otvara jako malo prostora za stvaranje novih vrijednosti. Ono što je cilj i koncept rada naredne Vlade je da se bavimo defanzivno u nekim ministarstvima otvorimo sav mogući prostor za brze hitre intervencije u u Ministarstvu privrede sa mnogo novih svježih ideja i nadamo se novih vrijednosti. Konkretno projekte i aktivnosti definisat ćemo analizom budžeta koji će se naći vrlo brzo na stolu nas, vas zastupnika i ova Vlada će imati zadatak da u prvim mjesecima svog rada hitno i hitro eventualno revidira ono što kao dokument bude usvojeno u ovim skupštinskim klupama tako da ćemo sigurno raditi rebalans budžeta u onom periodu u kom budemo brzo kapacitirani svi u svakom Ministarstvu i kao Vlada da ponudimo eventualno bolje prijedloge mjera. Kanton i Grad Sarajevo skoro da nemaju primarnog sektora privrede na čemu se hitno mora početi raditi putem ministarstva privrede suradnjom sa općinama i Federacijom po vertikali. Velika razvojna šansa Sarajeva je dalje razvoj turizma i ugostiteljstva, gdje se moraju dodatno razviti hotelski ugostiteljski kapaciteti kako u gradu tako na planinama. Pored toga mora se bolje pripremiti turistička ponuda u oblasti historije i kulture osmanskog, austrougarskog, socijalističkog i perioda rata što zajedno sa zimskim i planskim turizmom predstavlja najveću komparativnu prednost

Sarajeva. Mjere za jačanje konkurentnosti privrede i njenog razvoja na kojem će raditi Ministarstvo privrede. Jačanje poslovne infrastrukture, razvoj poduzetničkih klastera, inkubatora i tehnoloških parkova, razvoja povoljnog finansijskog okruženja za mala i srednja poduzetništvo i obrtnike, podrška razvoju i edukacije za poduzetnike, jačanje tehnološke infrastrukture, primjena i komercijalizacija znanja i tehnologija, poticanje kreativnih industrija, razvoj turizma, razvoj poljoprivredno prehrambene proizvodnje, održivo gospodarenje kantonalnim šumama, poticanje korištenja obnovljivih izvora energije, kogeneracije ekološki prihvatljivih goriva, povećanje energetske učinkovitosti u proizvodnji energije, sektorima industrije, sigurnosti i diversifikaciji energetske opskrbe u Kanton Sarajevo, uspostavljanje energetskog informacijskog sistema i komunikacijske strategije u energiji i klimi, profiliranje sadržano i oblikovano unapređivanje i reaktiviranje tržnica u Kanton Sarajevo, razvoj partnerstva sa civilnim društvom i poslovnim asocijacijama, razvoj sistema strateškog planiranja, jačanje kapaciteta za korištenje sredstava EU i drugih fondova, promovisanje Kanton Sarajevo kao lokacije za ulaganje, unapređivanje komunikacije protoka informacija između institucija uprave Kantona Sarajevo i javnih preduzeća, koordinacija zajedničkih aktivnosti u programima Kantona Sarajevo sa drugim kantonima i višim nivoima vlasti. Ja sam u početku rekao da su tri grane posebno bitne i posebno akcentirane a to su ove u kojima se bilježi rast zapošljavanje bruto društvenog proizvoda. Dakle IT sektor, turizam i metalska industrija. U ovom Ekspozeu ima podataka koje neću čitati sada a moći ćete ih pročitati koji pokazuju detaljnu analizu i stanje posebno u dijelu metalske industrije, nečega što ja iskreno nisam znao kao zastupnik u Skupština Kantona Sarajevo ili neko ko je zainteresovan da jedna ozbiljnija grana mogućeg razvoja Kantona Sarajevo i da je to jedan od mogućih pravaca u kom se možemo razvijati. Pokazatelji koje mi imamo od naših ustanova da u vrijeme posjećenosti da u vrijeme Sarajevo film festivala posjećenost hotelima ili popunjenost kapaciteta hotelskih od 11% govori o nefunkcionalnosti onog dijela alata koje država koristi za ostvarivanje svojih ciljeva. Dakle u tom dijelu turizma potpuno nejasna slika razvoja olimpijskih planina, njihovih potencijala i u zimskom a posebno u ljetnom periodu Igmana i Bjelašnice kao oaze za pripremu sportskih klubova ili boravka hroničnih bolesnika na planini sa najvećom koncentracijom ozona u Europi su prostor u koji ćemo sigurno hrabrije i odlučnije investirati počevši od bržeg vertikalnog transporta u dijelu prevoza skijaša na Bjelašnici do razvoja tih vrsta turizma medicinskog i rekreativnog na našim planinama. Prema podacima Svjetske turističke organizacije BIH je definirana kao jedna od tri turističke destinacije u svijetu s ukupnim potencijalom rasta turističkog tržišta od 10,5% za period do 2020 godine. Međutim ovako visoka stopa rasta također odražava izuzetno nisku baznu vrijednost sektora. Trenutno sektor turizma u BIH predstavlja samo 0,2% ukupnog europskog turizma. Potencijalna područja za razvoj sektora turizma su kulturno historijski turizam, gradski city brake turizam, seoski turizam, turizam na otvorenom, zimski sportovi, planinski turizam te banjski wellness zdravstveni turizam, kao i poslovni konferencijski turizam. Njena prirodna bogatstva i raznolikost planine, rijeke, blizina morske obale i jezera predstavljaju snažnu osnovu za razvoj turizma na otvorenom u BIH. Geografski položaj zemlje koja je smještena u središte Europe nudi potencijal za privlačenje velikog broja turista u krugu od tri sata letenja, jedinstvena kulturno historijska baština BIH uključujući i vjerske znamenitosti također nudi velike mogućnosti za razvoj kreativnog turizma u ovom segmentu. BIH je prepoznata kao dobra destinacija po prihvatljivoj cijeni zbog relativno niske cijene usluge i dobre ali dobre ali i ne i skupe ponude hrane i pića. Gostoljubivost je veoma važan faktor za stvaranje dobrog općeg dojma i poslovnih posjeta BIH. Prioriteti su pokretanje procesa izrade strategije razvoja turizma, zakonsko institucionalno jačanje turizma i usklađivanje sa europskim standardima, uspostavljanje povoljnijeg ambijenta za razvoj privatnog sektora u turizmu, internacionalizacija turizma i prevazilaženje parcijalnih dijelova koja zatvaraju turizam u lokalne okvire i popravljavanje imidža BIH u način reprezentativnog turističkog predstavljanja na međunarodnim turističkim tržištima Kantona Sarajevo kao njenog centralnog dijela. Zahvaljujući prirodnom bogatstvu BIH u pogledu rudnih sirovina, laka industrija odnosno metaloprerađivački sektor tradicionalno predstavlja najsnažniji sektor u zemlji. Udio ovog sektora čini gotovo ¼ ukupnog bh izvoza. Postoje tehnički kapaciteti za kalupno ljevanje, precizno ljevanje,

precizno ljevanje, rezanje, štancanje, presanje, oblikovanje obradu i zavarivanje a sve to čini osnovu proizvoda od metala. Sektor ima potencijal za značajno povećanje prodaje izvoza i zaposlenosti. U analizi trenutnog stanja dijelu malih i srednjih preduzeća došli smo do podataka da BiH bez obzira što stalno pričamo kako ima puno pravnih subjekata registrovanih za obavljanje nekih privrednih djelatnosti ni izbliza nije konkurentna niti je blizu evropskim prosjecima. Na 1000 stanovnika 4,7 malih preduzeća. Europski standard je 9,7. dakle mi u tom dijelu stimulacije razvoja malih srednjih preduzeća stalno govorimo kao potencijalnom razvoju privrede u Kanton Sarajevo imamo ogroman prostor za napredovanje i interesantno a do sada nije korišteno postoje u Sarajevu metodama EU definirana brzo rastuća preduzeća. Dakle ima ih takvih 40 do 80, u procentima od 10 do 20% brzog rasta i razvoja što su nama kao Vladi Kantona primarni partneri za nova zaposlenja. Dakle nećemo izmišljati procese niti izmišljati firme koje nemaju tržišnu stabilnost. Pružit ćemo ruku onima koji to već dobro i organizovano rade stimulišući ih čak i ekonomski, a posebno im pomažući u onom dijelu administracije pružit ćemo sve potrebne servise i usluge da oni koji uglavnom su izvozno orijentisani i sami već imaju kapacitete prodaje svojih proizvoda i plasmana proizvoda na strana tržišta od 100% i mogućnost povećanja još 200 do 400% bit će prvi partner u realizaciji ideja u metalnoj industriji i drugim privrednim granama koje su u glavnom izvozno orijentisani. Podatke smo preuzeli iz servera.

Govorili smo o problemima metalnog sektora, nedovoljan broj stručnih kadrova, broj kvalifikovane radne snage u metalnoj industriji kontinuirano opada zastarjela tehnologija, ne postojanje klastera kao veoma važan stub razvoja metalnog sektora, i tu je svaki novac investicija ni jedna marka nije potrošnja. Dakle tu ćemo sigurno investirati. Potencijalne potrebe su veliki potencijal za značajno povećanje prodaje zaposlenosti, tradicija u proizvodnji, upoznavanje sa procedurama i zahtjevima za izvoz na europska tržišta, usklađivanje poslovanja preduzeća sa formalnim zahtjevima za izvoz, usklađivanje obrazovnog sistema sa potrebama tržišta ovo je poseban akcenat u Ministarstvu za obrazovanje. Dakle usklađivanje obrazovnog sistema sa potrebama tržišta u ovom sektoru a IT sektoru, u sektoru pisanja projekata pristupnim fondovima IPA i drugim. Dakle taj dio ćemo institucionalizirati kroz Ministarstvo obrazovanja. Veliki potencijal za izvoz. Veliki potencijal za zapošljavanje novih radnika. Imate ovdje i brojeve zadnjih nekoliko godina broj uposlenih, broj procentualno porast izvoza i to ćete također imati kao dostupnu informaciju. Dio je također drvne industrije. Rast industrijske proizvodnje u oblasti prerade drveta osim namještaja u odnosu na 2013 i 14 godinu je bio 39,40% što pokazuje drugi mogući potencijal razvoja ove metalno drvne industrije. Postoji određeni broj neprivatiziranih firmi koje posluju po zastarjelim tržišnim principima, nedovoljno stručnog kadra, zastarjela tehnologija, izvozi se uglavnom sirovina, gotovi proizvodi se slabo izvoze, loš dizajn gotovih proizvoda, nizak nivo kvaliteta finalnih proizvoda, nepostojanje klastera kao i u metalnoj industriji su problemi. Potencijali i potrebe su veliki potencijal za izvoz, veliki potencijal za zapošljavanje novih radnika, kvalitetna sirovina, tradicija u proizvodnim relativno jeftina i vješta radna snaga, osigurava konkurentsku prednost, za industriju namještaja. Nedostatke vještina u kreiranju finalnih proizvoda, upoznavanje sa procedurama i zahtjevima za izvoz na EU tržišta, usklađivanje obrazovnog sistema sa potrebama tržišta. Ove definisane mogućnosti procentualno dokazane će biti koncept usklađivanja tržišta sa upisnom politikom u srednjem i visoko obrazovnim institucijama. Nekoliko karakteristika IT sektora. Ukupan broj zaposlenih oko 20 000. broj novo otvorenih kompanija u proteklih pet godina preko 150. broj novo otvorenih radnih mjesta u protekle tri godine je preko 1500. trenutno otvorenih radnih mjesta u ICT sektoru 147. u strukturi prihoda ICT kompanija preko 90% posto otpada na izvoz., Zanimanja u ICT sektoru najtraženija u svijetu i kod nas, softver programeri, dizajneri web sajtova i drugi. Jedini sektor koji pored turizma ima rast GDP u proteklom periodu 2011 5,1% , 2012 0,8, i 2013 4,1. jedini sektor gdje potražnja za radnom snagom trenutno veća od trenutne ponude i postoji ogroman potencijal za zapošljavanje sa relativno malim ulaganjima i trend rasta sektora prisutan u svim zemljama u okruženju. BH nema relevantne zakone koji podržavaju IT sektor i na njima ćemo također raditi.

Ministarstvo saobraćaja. Prioritet usluga javnog prevoza prioritet nije ni Gras ni Centrotrans ni privatni ni javni taksi prevoz, prioritet je javna usluga prevoza u Kanton Sarajevo. Uspostavljanje direkcije za javni prevoz Kanton Sarajevo jedna je od ideja Vlade Kantona Sarajevo. Formiranje posebne jedinice za nadzor i upravljanje mirujućeg saobraćajem na Kanton Sarajevo. Uspostavljanje centra za upravljanje saobraćajem na području Grada Sarajeva. Izgradnja biciklističkih staza i razvoj biciklističkog saobraćaja na području Kantona Sarajevo. Donijet ćemo odluke da se što prije započnu radovi na nastavku južne longitudinalne i transverzala kao i na devetoj transferirali. Propustio sam da u ovom dijelu privrede kažem o dva kapitalna potpuno neiskorištena zakona koji će također biti dio ovog koncepta, Zakon o javno privatnom partnerstvu i Zakon o koncesijama, koji čini mi se što zbog svojih proceduralnih problema nadležnosti lokalne zajednice i Kantona Sarajevo dio toga smo popravili a više zbog nedostatka ideja kreativnih ljudi u ovom sektoru i hrabrosti da se krene u implementaciju ovih zakona. Mi ćemo biti oni koji ćemo možda i pogriješiti u nekim stvarima ali ćemo u to sigurno drugačije, i odgovornije i puno hrabrije krenuti tražeći partnere i svjež kapital u dijelu privatnog sektora a zadržat ćemo kontrolu prisustvom države Kantona Sarajevo i njenih organa i institucija u upravljanju određenim procesima. Zakon o koncesijama odnosno javno privatnim projektima imamo i na državi i na entitetima a tiče se ovog dijela za saobraćaja, istražiti ćemo sve mogućnosti finansijske aspekte u dijelu saobraćajne infrastrukture u kontekstu ovih zakona jer ostavljaju mogućnost koncesionih ugovora i u dijelu saobraćajne infrastrukture, finansiranje planiranih projekata mora se iznaći i pored kreditnih zaduženja od evropskih institucija i nove načine iznalaženja finansijskih sredstava, znatno više mora i Kanton i lokalna zajednica ulaziti u realizaciju pojedinih projekata putem EU fondova. IPA je drugi. Te daleko više korištenja fondova sa Bliskog istoka, sa prilično povoljnim uslovima kreditiranja. Javni gradski i prigradski prevoz jedna od ključnih funkcija od čije dobre organizacije zavise mnoge druge funkcije Kantona Sarajevo. Ni sektora obrazovanja, ni sektor privrede ni sektor pružanja komunalnih usluga, ne mogu biti na nivou ukoliko radnici nisu u dobro organizovanom javnom prevozu u prilici da redovno dolaze i obavljaju svoje poslove. Plansko djelovanje koncepta sistema javnog gradskog prevoza putnika Kantona Sarajevo treba da se osloni na osnovne karakteristike masovnog prevoza putnika duž osnovne gradske saobraćajnice, kičme Bašćaršija Ilidža sa naglašenim maksimalnim opterećenjem na dijelu Nedžarići – Radićeva, posebno u špici te na pravcima od Hadžića, Ilijaša do centralnih dijelova grada. Povezivanje centralnog sa padinskim dijelovima grada i prigradskim područjima kapacitivnim i pouzdanim javnim prevozom. Napajanje sistema masovnog i brzog prevoza putnika sekundarnim elastičnim sistemom autobus i minibusi sa euro motorom prirodnim gasom ili čistim alternativnim pogonom, primjena elektro vuče u masovnom i prevozu užem u gradskom području zbog izduvnih gasova i ekonomičnost. Tretiranje javnog prevoza putnika kao fleksibilne uslužne industrije orijentisane prema korisnicima usluga, sa ciljem da bude efikasan, efektivan i finansijski održiv uvažavajući socijalne, ekonomske razloge. Novi sistem koncepta javnog gradskog preduzeća u Kanton Sarajevo treba da se bazira na postupnoj transformaciji postojećih vidova prevoza u integralni sistem na nivou Kantona Sarajevo kroz sljedeće aktivnosti: transformacija tramvajskog u lakošinski sistem, tramvajska pruga izgradnja Nedžarići – Dobrinja – Ilidža – Hrasnica. Tramvaj voz sistem za povezivanje prigradskih naselja sa užim gradskim područjem, davanje maksimalnog prioriteta vozilima javnog gradskog prevoza putnika, trolejbuske dionice izgradnja i uvođenje sistema parkiranja i vozi. Ima dvadesetak akata koje smo apostrofirali kao dio zakonske legislative koja je bitna kao pretpostavka za implementaciju ovih ideja neću vam to čitati. Bit će preobimno i ovdje se ponovo vraćamo na onaj dio integralne priče o cijelom sistemu. Gras kao firma sa nedefinisanim ekonomskom cijenom, sa nedovoljnim subvencijama potrebnim za održavanje njihovog za normalno ekonomsko funkcionisanje Grasa a istovremeno nagomilani problemi u dijelu potreba ljudi koji su tamo uposleni. Neplaćeni doprinosi, neredovnih primanja i plata, neraspoređenih radnih mjesta, mislim da ćemo mnogo hrabrije i odgovornije od preuzimanja kontrole i štampe karata u Grasu kao jedne od prvih ciljeva za stabilizaciju tog preduzeća do racionalizacije i bolje podjele poslova unutar te firme doprinijeti ovom dijelu uspostave boljeg javnog prevoza koristeći konkurenciju kada god je to potrebno ali štiteći interese firme čiji smo

osnivač. I ja sam zagovornik da prije nego što krenemo u tu finalnu ili zadnju priču o stečaju koju mnogi zagovarate argumentovano ipak iskoristimo sve moguće alate koje nismo iskoristili ni zaključcima ove Skupštine ni u implementaciji tih ideja nismo, meni bi nešto bilo žao da to ne pokušamo a da krenemo u realizaciju onog najradikalnijeg dijela gašenja Grasa i eventualno ostajanja bez posla ljudi koji tamo rade. Ovaj dio zakona o javnom, dio zakona o taksi prevozu je ostao u onoj fazi u kojoj smo pri kraju da odredimo tačan broj onih koji rade, tačan broj onih koji su dužni a ti koji su dužni da vrate to što su dužni, i tom brzom analizom mislim da ćemo brzo doći u situaciju da čak otvorimo neka nova radna mjesta u ovom dijelu potreba Sarajeva bez obzira na one brojeve 1:500 ili 700. potrebe Kantona Sarajevo su drugačije posebno ako budemo radili na razvijanju turizma i veća posjeta ljudi koji posjećuju Sarajevo, siguran sam da ćemo brzo morati imati nove vozne jedinice u pružanju ovog dijela taksi usluga. Ministarstvo za rad socijalnu politiku i raseljena lica i izbjeglice većim dijelom ovog ekspozeta dotakli smo no što se tiče tog konkurentnog dijela kroz Zavod za zapošljavanje u kom su značajna sredstva raspoređena, neke projekte neki su bili zaista dobri, neki nisu u dijelu finansiranja pripravnika, uvjerio sam se da je dobar dio te vrste edukacije nepotreban jer najveći broj pripravnika koji završe neki pripravnički staž u firmama ne ostaju da rade u tim preduzećima tako da pokazujemo da ih nismo obučili za poslove koje bi tamo trebali raditi, tako da ćemo u dijelu reorganizacije ministarstva obrazovanja i edukacije za potrebne profesije na tržištu rada elocirati dio tih sredstava i investirati u dio razvoja edukacije za IT sektor, turizam i metalsku industriju. Zakonski ćemo definirati da prednost pri zapošljavanju imaju članovi porodica u kojima niko nije zaposlen, ova mjera nužno će biti praćena potrebnim izmjenama i dopunama postojećih, odnosno usvajanjem novog zakona uz obavezno definiranje i provedbu aktivnosti i mjera usmjerenih koje suzbijaju sivu ekonomiju, neprijavljenih neregularnih, neformalnih radnika. Ujednačiti prava na novčanu naknadu svim majkama porodiljama i u skladu sa nadležnostima Kantona obavezati poslodavce na isplatu razlike. Detaljno razmotriti postojeća i propisati nova rješenja kada je u pitanju pravo na dječji dodatak, visinu dodatka, a posebno za dvoje i više djece. Uspostaviti sveobuhvatnu jedinstvenu evidenciju korisnika budžetskih naknada u sistemu socijalne pomoći kroz razvoja integriranog informacijskog sistema. Precizno definirati uvjete za ostvarivanje naknade stalne novčane pomoći u cilju sprječavanja zloupotrebe te povećati naknade za najugroženije građane. Nastaviti pozitivan trend kontrole javnih nabavki racionalnog trošenja novca na socijalna davanja, što je u proteklih nekoliko godina bio slučaj u Ministarstvu za rad, socijalnu politiku. Napravljene su ogromne uštede, racionalizirana ta potrošnja u dijelu plaćanja javnih kuhinja, u dijelu plaćanja nabavki ogreva i drugih potreba socijalno ugroženih kategorija. To Ministarstvo je radilo taj dio posla dobro i na tome ćemo istrajavati uz neke nove metodologije i unapređivati. Kroz zavod za zapošljavanje u saradnji sa ministarstvom obrazovanja i nauke mladih raditi na usklađivanju potreba tržišta rada sa upisnim politikama, u srednjim školama, UNSA, to ponavljam peti ili šesti put.

Ministarstvo za boračka pitanja

Neki procesi koji se 20 godina nakon agresije na BIH vode jednom dijelu javnosti izgledaju kao nepotrebni ili kao već završeni. Akcenat na status boraca šehidskih porodica, RVI, i njihovih porodica neće prestati nikad. Akcenat na status tih ljudi bit će također uvijek jedan od primarnih zadataka ove Vlade. Sačinit ćemo jedinstven registar učesnika odbrambeno oslobodilačkog rata kontinuirano obezbjeđivati stabilnije izvore finansiranja svih prava boračke populacije, podržati projekte samozapošljavanja boračke populacije finansiranjem razvoja malih preduzeća, poljoprivrednih zadruga. Intenzivirati podršku zapošljavanju članova boračke populacije i njihovih porodica u svim segmentima društva. Stambena pitanja boračkih kategorija rješavati na sveobuhvatan i ekonomski prihvatljiv način uz programe povoljnih kredita na period od 20 godina, nastaviti brigu o izgradnji, uređenju i održavanju spomen obilježja i mezarja šehida poginulih boraca u BIH, o mjestima stradanja nevinih žrtava rata, kao i o kolektivnoj memoriji vrijednosti našeg odbrambeno oslobodilačkog rata, i ono što je najveći problem u dijelu prava boračke populacije je ne pridržavanje ili ne poštivanje zakona. Zakonska legislativa Kantona Sarajevo nije loša kada je u pitanju status boračke populacije i vrlo često se ne primjenjuje. Ne primjenjuje se ni u

onim dijelovima sistema koje mi kontroliramo i sjećamo se nekoliko slučajeva u kojima su osporavana prava na školovanje, u kojima se ne poštuje pri zapošljavanju pravo koje se povlači iz Zakona o dopunskim pravima boraca, šehidskih porodica, RVI. Imali smo nekoliko egzaktnih primjera i pokazatelja, neću danas ili inače hoću vrlo često javno i poimenično govoriti o tim procesima i o ljudima koji takve procese zaustavljaju ili te pozicije zloupotrebljavaju i riješit ćemo brzo jedan od tih koje smo budžetom čak ćemo ga i predvidjeti da se riješi da sva djeca šehidskih porodica, borci i njihova djeca ostvaraju prava iz zakona koji govori o dopunskim pravima boraca.

Ministarstvo kulture i sporta

Pristupit ćemo izmjenama i dopuna Zakona o sportu na nivou Kantona kao i donošenje neophodnih pravilnika i drugih podzakonskih akata. Ubrzat ćemo donošenje Strategije o sportu, kreirati baze podataka nadarenih perspektivnih sportaša i sportaša školskog uzrasta, uspostaviti insitucionalnu suradnju odgojno obrazovnih ustanova Kantona Sarajevo sa sportskim organizacijama, entitetskim i državnim strukovnim savezima, punu podršku dati razvoju invalidnog sporta i osigurati pravo osobama sa invaliditetom, da sudjeluju u sportskom životu potpuno ravnopravno sa drugim osobama. Preciznije i jasnije definirati zakonski kriterij za pomoć sufinansiranja i finansiranja sportskih organizacija i uspostaviti mehanizme kontrole trošenja sredstava dodijeljenih iz budžeta. Urediti oblast upravljanja sportskim objektima i sportskim manifestacijama kroz posebne zakonske propise. Uspostaviti sistem javno privatnog partnerstva kao bitnog elementa čime bi se omogućilo pojedinim sportovima, odnosno klubovima efikasnije finansiranje što bi otvorilo prostor za veći i brži razvoj. Razvijati masovni sport u osnovnim i srednjim školama kao i na univerzitetima. Rekreaciju pretvoriti u masovnu pojavu koju ćemo podsticati kao sistemsko organizovano bavljene sportom. Povećati broj nastavnih sati tjelesnog odgoja za djecu. Uvesti jedinstveni registar davanja na nivou cijele BIH sa tačnom evidencijom o dodijeljenim budžetskim sredstvima svim sportskim organizacijama i pojedincima. Vrlo često ja svjedočim iz te branše sam došao nekada prije bavljenja politikom da su sposobni menadžeri u BIH oni koji znaju obezbjediti sredstva za rad sportskim klubova a ne oni koji znaju upotrijebiti ta sredstva i proizvesti neku sportsku vrijednost. Dakle najveći nedostatak tome je što se sa nekoliko nivoa vlasti obična neka školica nekog sporta bolje finansira nego jedan ozbiljan sportski projekat koji u svojim pogonima gaji i odgaja razvija educira sa 200, 300 i 500 i više stotina djece, tako da ćemo tom jedinstvenom bazom podataka koliko ko s kojeg dijela nivoa vlasti dobija sredstava imati egzaktne pokazatelje a nije neki posebno zahtjevan i težak zadatak. Dakle, s druge strane mi kao dio države BIH možemo se pohvaliti odnosom prema sportu mnogo boljim nego što ga ima ostatak države jer napominjem još jednom, po ko zna koji put, sa ovog budžeta se finansira duplo više sredstava se izdvaja u Kantonu Sarajevo od onoga što država na nivou Vijeća ministara i Federacija kroz Ministarstvo kulture i sporta izdvoji ukupno za sport. Znači oni zajedno cca 2 miliona, mi sami preko 4 do 4,5 miliona često vodeći računa i o onome što nije nadležnost isključiva Kantona Sarajevo a i dalje ćemo to raditi, finansiranje i reprezentativnih selekcija i ustanova, institucija u kulturi, koje su na nivou države i FBIH o njima bi trebali voditi računa. Taj kurs nećemo mijenjati iako nam dosta otežava naš neki bolji kvalitetniji razvoj onog dijela nadležnosti sporta u Kanton Sarajevo. To su prije svega taj razvojni, školski, rekreativni, pa i onaj dio vrhunskog koji nas zanima kroz klubove.

Kultura, provesti reformu organizacije rada javnih institucija iz oblasti kulture u cilju njihove racionalizacije i bolje funkcionalnosti. Institucionalno osnažiti saradnju između ustanova kulture, odgojno obrazovnih ustanova u Kanton Sarajevo, te osigurati minimalne cijene ulaznica za muzeje, pozorišta, galerije i drugo za školsku djecu i omladinu, nastaviti sa aktivnostima na očuvanju zaštite i rekonstrukciji kulturno historijskih objekata u Kanton Sarajevo, edukacija kadrova za kvalitetnije marketinške aktivnosti, jedinstvena baza uposlenih i bolja koordinacija između javnih ustanova. Ono što je moje iskustvo i ono što, jedna je stvar činjenica nigdje gdje radimo uštede nećemo predlagati da se te uštede osim u posebnim slučajevima troše van tih resora. Dakle te uštede koje planiramo napraviti integracijom javnih nabavki recimo u kulturi, ili procesom koje su ministri već započeli integracijom javnih ustanova, racionalizacijom i boljom kontrolom korištenja tih prostora, od nekoliko ovako vrlo inventivnih ljudi iz kulture čuo sam prijedloge da napravimo zajedničku listu

glumaca, listu i da oni između sebe bolje komuniciraju ne fakturišući jedni drugima jer su svi uposleni na platama su Kanton Sarajevo. Dakle ta integracija treba da proizvede novi dodatni novac koji bi smo reinvestirali isključivo i samo u kulturu. U onaj dio potreba koji nije na zadovoljavajućem nivou jer plate uposlenih u kulturi i ljudi koji jesu se popravljali u zadnjih nekoliko godina ali još uvijek nisu na nivou nekih europskih standarda. U dijelu sporta se odnosi na isto. Dakle sve što budemo akumulirali ili gdje zaustavimo nenamjensko trošenje tih sredstava reinvestirat ćemo u sport u one njegove dijelove koji su prijeko potrebni.

Ministarstvo unutrašnjih poslova

Ja sam u ovoj definiciji kada sam radio te opšte ocjene ja sam to ovako pročitao: sigurnosni sistem koji od pronalaska počinitelja krivičnih djela do njihovog procesuiranja i kažnjavanja ne zadovoljava standarde potrebne za siguran život naših građana, a posebno neefikasan sistem u borbi protiv privrednog kriminala i korupcije u javnoj upravi. Pazio sam da nečim ne povrijedim policiju ministarstva unutrašnjih poslova Kantona Sarajevo jer procenat koji pokazuje stepen pronalaska počinitelja krivičnih djela je vrlo ozbiljan, vrlo su operativni, vrlo dobro rade svoj dio posla. Mi smo također imali senzibiliteta pa smo dozvoljavali da ta sistematizacija bude skoro popunjena, pa smo u budžetu dali sredstva za upošljavanje preko 200 novih policajaca koji treba da vrlo brzo preuzmu svoje funkcije u sistemu, naravno ima se tu još dosta stvari popraviti. Ima dijela nabavke sredstava za rad, informatizacije, onog dijela modernizacije rada Ministarstva unutrašnjih poslova na osnovu standarda koje vidimo u Europi su dakle sigurno stvari koje se mogu raditi bolje ali ovo što radi najopterećeniji dio sigurnosnog sistema zove se MUP Kantona Sarajevo. I kada smo imali skoro razgovore o organizaciji i obezbjeđivanju sportskih manifestacija podatak da u toku jedne godine Kanton Sarajevo obezbijedi 1740 sportskih manifestacija, mislim da uz dužno poštovanje u drugim Kantonu policajac za svoj radni vijek ne obezbijedi toliko koliko oni obezbijede u jednoj godini. I najčešće se radi o skoro pa istim ljudima. Dakle pokazuje i stepen njihove opterećenosti i pokazuje i stepen njihove profesionalnosti. Nema tu velikih problema i ovaj dio za koji naravno ne možemo reći da živimo u sigurnom u bezbjednom gradu, eskalacija je dešavanja na našim ulicama u posljednjih nekoliko mjeseci. Česti su povratnici u činjenju krivičnih djela i zato sam to apostrofirao kao dio cijelog sistema. Značajnija uloga u ovom bit će ministra pravde nego ministra unutrašnjih poslova u dijelu zakonske legislative koja je mnogo radikalnija odgovornija, prema počiniocima krivičnih djela u brzom radu Tužilaštva i naših sudova uz naravno argumentaciju da ćemo izaći u susret zahtjevima da se tamo zaposle neki novi ljudi. Tražit ćemo da se ponove neki procesi u dijelu privrednog kriminala koji su skoro pa zatvoreni a znamo da nisu čisti. Dakle to je taj sistem u kojem ne možemo policajca niti MUP Kantona Sarajevo pokazati kao primarno odgovornog za ono što se trenutno na ulicama Kantona Sarajevo dešava i zajednički je zadatak nekoliko ministarstava apostrofirano prije svega ministra pravde i nas kao Vlade a onda ministra unutrašnjih poslova jer su ovi pokazatelji tačni, provjereni i mjerljivi sa drugim gradovima u kojima se iste takve stvari također dešavaju. Intenzivirat ćemo rad na funkcionalnom i profesionalnom jačanju policijskih struktura u skladu sa visokim standardima i to kroz primjenu modela 3K. Komunikacija – koordinacija – kooperacija. Kroz bolje opremanje obuku i kadrovsko jačanje policijskih snaga uz donošenje propisa o standardizaciji određenih poslova u fokus koordiniranog policijskog djelovanja staviti krivična djela privrednog kriminala, zloupotrebe opojnih droga i krađe motornih vozila, jer su trenutno najbrojniji. Poduzeti sve mjere za uspostavu znatno boljeg stanja u oblasti javnog reda i mira, posebno kroz pojačano prisustvo i saradnju policije u lokalnoj zajednici kao i nastavak uspostavljanja sistema video nadzora na ključnim lokalitetima. Pojačati mjere sigurnosti u saobraćaju sa ciljem znatnog smanjenja broja smrtnih slučajeva i teških povreda svih kategorija učesnika u saobraćaju. I poduzeti efikasnije mjere za uklanjanje pasa lualica sa ulica Kantona Sarajevo.

Ministarstvo pravde i uprave

Zadaci u pravosuđu: osiguravanje uvjeta kvalitetnog funkcionisanja izgradnje pravosudnih institucija Kantona Sarajevo i očuvanje njegovih temeljnih vrijednosti. Poduzimanje aktivnosti da pravosudne institucije budu dostupne svima i da na principima vladavine prava obavljaju svoju funkciju te da su

potpuno osposobljenje za djelovanje unutar EU: zadaci u upravi unapređenje sistema javne uprave radi osiguranja i zaštite javnog interesa, zakonitog djelovanja i pružanja usluga u ostvarivanju prava građana i privrednih subjekata. Izgradnja moderne i prema korisnicima usmjerene javne uprave. Ustrojiti bolju i efikasniju administraciju kroz uspostavu sistema elektronskih usluga i donošenja zakona o državnoj službi na nivou Kantona Sarajevo čije će odredbe preferirati stručnost i kompetentnost prilikom zapošljavanja, kao i obaveze odgovornosti uposlenika u državnoj službi. Uvesti moratorij na zapošljavanje u javnom sektoru tokom perioda stabilizacije od 12 mjeseci. Zadaci segmenta i rada javne uprave također su velikim dijelom apostrofirani u zadacima Vlade i planovima rada svih ostalih resornih ministarstava, i to je načelno pravac rada i djelovanja Vlade Kantona Sarajevo u narednom periodu četiri godine uz drugi dokument koji ćemo nadamo se brzo dobiti na zastupničke klupe zove se Prijedlog budžeta Kantona Sarajevo i naš pristup da taj dokument i ovo što smo sebi zacrtali kao ciljeve vrlo brzo dovedemo u sklad tamo gdje primijetimo da je potrebno eventualno neka intervencija ili rebalans budžeta brzo ćemo to zatražiti od vas i još vas jednom pozivam da kao što do sada nismo baš često radili, opravdano kritikujete i ovu Vladu koja će biti transparentna i imat ćete dovoljno informacija, date podršku onim projektima koji neki od vas jesu bez obzira sjede li u opoziciji ili poziciji nastavite s tom praksom. Oni koji nisu počnete s tom praksom. Imat ćete priliku da nas ocjenjujete i javno i stalno i posebno na sjednicama Skupštine Kantona Sarajevo a mi ćemo za sve ono što nas budete optuživali nije tačno, argumentovano i vrlo hrabro se braniti. Hvala vam na razumijevanju i nadam se da ćemo sarađivati.

(uslijedio aplauz prisutnih)

Predsjedavajući:

Zahvaljujem uvaženom zastupniku kandidatu za premijera Konakoviću i ovim putem otvaram raspravu. Za raspravu se javio uvaženi zastupnik Solaković.

Poslanik/zastupnik Adnan Solaković:

Hvala lijepo. Našem bivšem kolegi zastupniku a sadašnjem premijeru, mladom hrabrom, ma jeste, čestitam. Izlaganje Ekspozea nadam se da ćemo ga dobiti u pismenoj formi gospodine premijeru ni jednog momenta niste, osvrnuli ste se jako šturo na Tužilaštvo, sudstvo niste spomenuli da ćete paralelno radeći svoj posao upravo ovaj što ste sada Ekspozeom izlagali, da ćete paralelno i procesuirati upravo ljude kriminalce koji su dotjerali do ove situacije u Kanton Sarajevo. Od rata prema ovamo stranke i njihovi direktori, NO i UO su dotjerali da je Kanton Sarajevo doživio dno dna. Volio bih da se to procesuiru a ja kao i član što sam bio Komisije za sigurnost, gdje je gospodin uvaženi zastupnik Kemal Ademović bio predsjedavajući sam i tražio da mi se dostave ti podaci ja nisam nikada dobio te podatke koji leže u ladici upravo ljudi koji su nas dotjerali do ovakve situacije. Volio bih da to pokrenete. A što se tiče boraca ne sumnjam gospodine premijeru da ćete vi to uraditi sve najbolje jer ste i sam bili kao maloljetnik borac i to iz mog dijela Starog Grada što poštujem cijenim i sve ostale, no međutim nemojte dozvoliti a to je već i urađeno da zlatna mladež, zlatna generacija koji su preko naših šehida invalida, gazija napravili sebi grad na Bjelašnici, gore uživaju a naši borci su po kontejnerima. Hvala lijepo. Nadam se da ćete ovo uvažiti gospodine premijeru.

Poslanik/zastupnik Zvonko Marić:

Hvala gospodine predsjedavajući. Drago mi je da smo napokon čuli i ovo što nam je budući premijer prezentirao ili pročitao iz referata, nešto jeste nešto nije ali izražavam žaljenje što nismo imali prilike da vidimo ovo ranije i nekako nas je prisililo na to da pratimo zorno ovo i da ne pripremljeni za ovu diskusiju govorimo o onome kako smo mi zapravo doživjeli ovo što je on pročitao. Ja razumijem sve te probleme koji prate formiranje vlasti zbog složene političke situacije ali idem i tom logikom da svi ljudi dakle i svako ima pravo i to je stara istina, svako ima pravo na šansu. Mislim da i ovi predloženi kandidati za ministre imaju pravo na to. Prema tome zamjeram što u ovom obraćanju

gdina Konakovića nismo čuli ništa od onoga kako riješiti ove probleme. Nema mehanizama. Znači ovo što smo čuli, dakle svako od nas ko bi se obratio ovoj Skupštini iz ovih klupa pobrojao bi sve ove probleme kada bi tražio podršku za svoju politiku. A znači li to da taj ko je u stanju da može da pobroji sve te probleme može da bude i predsjednik Vlade? Ne znači. Naprosto to ne znači. I zato osim činjenice da nismo imali priliku, imao sam u jednom trenutku budući da sam pokušavao doći do ovog dokumenta kao da je to strogo čuvani dokument Pentagona. Ne možemo vidjeti o čemu ćemo raspravljati toga dana. Moram kazati i to da nisam čuo ni jednu riječ o funkcioniranju Vlade u krizi, ili mehanizmima, ili možda ja vjerujem da smo u krizi a gospodin mandatar vjeruje da to nismo. Nije dat odgovor ni na jedno pitanje a mandatar je govorio već dugo vremena i nije ponudio odgovore koje smo od njega očekivali a zaslužila je i javnost i svi mi koji smo sa nestrpljenjem mogu reći iščekivali neke reformske zahtjeve koja će nova politika kreirati. Toga nije bilo. Gospodine mandataru, evo konkretno, niste rekli ni jednoga trenutka o javnim poduzećima kako i na koji način riješiti te goruće probleme. Ovdje sjedi sa moje lijeve strane uvaženi ministar Bubica koji je svojevremeno rekao da 280 radnika u javnom poduzeću Gras ima koji primaju plaću a ne dolaze na posao. U normalnom društvu ili bi gospodin Bubica evo ja otvoreno razgovaram potpuno sam transparentan odgovarao bi on ili oni koji su omogućili takvu nelegalnost protuzakonitost. Dakle problema je jako puno a ovo što smo čuli je prema mom sudu spisak želja i mi znamo za se te potrebe i potrebu za borbom protiv kriminala korupcije i stalno svaki od nas bi to pomenuo međutim konkretnih mjera ne vidimo. Šta je sprječavalo ranije Vlade da se bore protiv kriminala i korupcije? Šta ih je to sprječavalo? Molim vas gospodine mandataru zaista želimo da budemo konstruktivna opozicija u određenom segmentu gdje god treba da pružimo mogućnost za dijalog, da razgovaramo i da vam pomognemo sa nekim sugestijama. Ne bježimo od te odgovornosti ako to vi naravno želite. Međutim, evo konkretno jedan zastupnik koji sada već tu nije koji je rekao da i hvali se po medijima da zna javno poduzeće koje ima sedam savjetnika određeni direktor. Ali neće da ga kaže. Pa javnost ima pravo na istinu. To je njegova obaveza kao zastupnika da kaže istinu građanima koje je to poduzeće, kakva mu je to argumentacija za šta krije taj argument. Pa gledao sam ga nekoliko puta na televizijskim emisijama u medijima da govori o tome. Pa neka kaže koje je to poduzeće jer u suprotnom on je saučesnik u tome. Zašto on prikriva? Pa to je zločin. On saučestvuje u prikrivanju zločina. Što se tiče, gospodine mandataru obrazovanja pa mogu vam reći da su tu nagomilani problemi i da ste ih vi uglavnom detektirali. Činjenica je da Univerzitet treba da bude lider, UNSA barem u mnogim stvarima. Ali da li vi znate možda znate statistiku činjenicu da je 30 do 40% funkcionalno i tehnički nepismenih učenika u našim školama? Zašto ne uđemo u uzroke takvog stanja, pročitaju a ne znaju šta su pročitali. Pa barem ja imam u tome iskustva. Ljudi koji konkuriraju dođu sa fakultetom itd. konkuriraju za mjesto novinara. Hoće li ministar obrazovanja da ide od kuće do kuće da ih opismenjava? A kakav kadar smo zaposlili u tim ustanovama? To su elementarne stvari i ono na što treba odgovoriti. Također govorili ste i o policiji, govorili ste čak i o nekim statističkim podacima, a mi znamo šta je statistika. Statistika je poput bikinija prikriva ono najbitnije. Ono što bi moglo biti interesantno. A sve drugo je manje bitno. Mene interesira i volio bih da sam bio u prilici da odgovorim, da postavim pitanje gđinu Kozadri a nisam ali ću zato vama gospodine mandataru postaviti sljedeće pitanje. Da li se vi slažete sa politikom da se doniraju uniforme koje su kupljene svojevremeno za 1,2 miliona ili 1,5 milion KM i u jednom trenutku je rečeno da su te uniforme radioaktivne. Zbog toga je ministar smijenjen. To je novac poreznih obveznika Sarajevskog Kantona. Sada idemo u Goražde poklanjamo uz svu medijsku pompu. Znači li to da su goraždanski policajci manje osjetljivi na radioaktivnost tih uniformi?? Ili u Orašju? Znači policajci iz Orašja su potpuno imuni na radioaktivnost. Otkud pravo, ja u jednom trenutku barem sam takvu informaciju imao da je gospodin Kozadra takvu namjeru htio da osujeti nije htio da stavi saglasnost na to. Međutim mi prisustvujemo takvim manifestacijama, tom opskurnoj pozorišnoj predstavi gdje se tobože manifestira humanost prema nekim drugim kantonima. Razumijem treba je biti ali prije svega treba humanost pokazati ovdje među nama, humanost i povjerenje. Povjerenja ovdje koliko ja vidim nema. Na prvoj sjednici smo vidjeli da ga nema između koalicionih partnera. Jer kolege iz DF-a vi znate rebalans budžeta nisu usvojile nisu glasali za njega. Šta su time

demonstrirali? Jedinstvo? Na osnovu čega je formirana ova koalicija, istih ciljeva, možda politike, možda interesa? Dakle ono je ključno što nama ovdje treba povjerenje. Povjerenje prije svega koalicionih partnera pa svih nas. Ja koliko vidim i sami ste svjedoci da više imate problema sa opozicijom unutar vladajuće koalicije nego sa bilo kojom opozicionom strankom ovdje koja sjedi u ovom parlamentu. Znao ovo što smo čuli izgleda nam poput onoga: „Sretan je narod koji ima pred sobom velike ciljeve“. Meni je drago da gospodin Konaković kojeg poznajem prihvatio je tu odgovornost ali ne znam da li je svjestan činjenice da zbog pogrešnih poteza koji su ranije uvučeni i napravljeni da je na neki način napravljeno ispred njega minsko polje u koje on treba da zagazi. Znao nije suština i vlast ovdje pitanje izbora vlasti. Ovdje je pitanje mogućnosti i spremnosti da se prihvati odgovornost utoliko prije što smo ranije u ranijim periodima imali mogućnost izbora. Može gospodin Konaković da se ne sviđa ali ova Vlada nema puno izbora. Jedan je put za izlazak iz ovih problema ispred koga je minsko polje.

Predsjedavajući:

Moram vas prekinuti vaše vrijeme je isteklo, isteklo je 10 minuta vaših. Zahvaljujem uvaženom zastupniku Mariću.

Poslanik/zastupnik Selma Filipović:

Koristim priliku da pozdravim sve prisutne. Da čestitam novom mandataru na Ekspozeu. Pozdravljam poštovane građane Kantona Sarajevo. Ja imam par konkretnih pitanja za našeg mandataru a odnose na malo zdravstvo, malo obrazovanje. Pitam uvaženog mandataru kako će riješiti pitanje velikog broja nepriznatog kadra u KCUS te veliki broj nepriznatog kadra je na fakultetima akademijama i institutima. Da li ima neki plan kako da riješi ovo pitanje? Radi se o velikom broju nepriznatog kadra. Dalje, slažem se po pitanju obrazovanja i zaista treba staviti poseban akcenat na razvoj ministarstva obrazovanja i to posebno što se tiče osnovnog i srednjeg obrazovanja. Međutim, nameće se jedno pitanje jer ako imamo informaciju o stalnom smanjenju stope nataliteta u BiH čak nekih 4,7% tako isto i u kantonu pa se pitam se kako da li je razmišljao mandatar o ovom pitanju, jer imamo veliki broj nastavnika imamo velika finansijska sredstva koja izdvajamo za ovo obrazovanje i osnovno i srednje, međutim veliki broj novoadaptiranih, uređenih škola a sve manji i manji broj djece po našim školama. Kako će se mandatar očitovati po ovom pitanju? Dalje, kako mislite osigurati sredstava za nauku, svi dobro znamo da bez finansijskih sredstava nema ni nauke. Znamo da se iz budžeta Kantona Sarajevo izdvaja na godišnjem nivou nekih 66 miliona za visoko obrazovanje međutim koliko je meni poznato to je samo za lične dohotke. Nije za nauku. Dalje, kako ćete riješiti pitanje da se izjednače lični dohodci na UNSA po nekim informacijama sa kojima raspolažemo trenutno imamo velika odstupanja po ovom pitanju na UNSA, pa tako na jednom fakultetu imamo da dekan ima plata 78.000 KM na godišnjem nivou. Na drugom fakultetu ima platu 35.000 KM. Tiče se i samih zaposlenika da na nekim fakultetima imamo mnogo manje lične prosječne lične dohotke u odnosu na druge fakultete. Pitam budućeg premijera da li je razmišljao o ovom pitanju i kako ćemo znači iznivelisati lične dohotke na UNSA i poboljšati standard naših nastavnika? Šta ćete uraditi po pitanju sprječavanja odlaska mladih kadrova iz Kanton Sarajevo i to zbog nezaposlenosti, nemogućnosti osnivanja porodica, ne rješavanja stambenih pitanja i kako ćemo stimulisati mlade da ostanu? Školovane ljude u našem kantonu. Kako mislite vršiti adekvatan kontrolni rad nad visokim obrazovanjem sa jednim zaposlenikom, odnosno jednim inspektorom za visoko obrazovanje. Naravno imate li u planu jačati i druge kantonalne inspeksijske organe? Šta znači poduzeti efikasnije mjere za rješavanje pasa lualica i koje su to mjere i po meni ste se malo osvrnuli po pitanju sigurnosti odnosno nesigurnosti u Kanton Sarajevo koje su to konkretne mjere kako bi osigurali građanima bolju sigurnost? Šta će se uraditi sa maloljetničkom delinkvencijom i kao da se plašite konkretnije govoriti o policiji i njihovom neradu u Kantonu Sarajevo. Hvala lijepo.

Poslanik/zastupnik Izudin Bajrović:

Hvala uvaženi predsjedavajući. Želim da se zahvalim kandidatu za mandatara gđinu Konakoviću na vrlo iscrpnom Ekspozeu koji sam zaista vrlo pažljivo saslušao, vrlo kvalitetnom Ekspozeu, što se na kraju krajeva od gospodin Konakovića i očekivalo. Ali ipak ću na neki način prokomentarisati i molim gospodin Konakovića da ovo ne shvati kao političko prepucavanje protiv kog je on a protiv kog sam također i ja. Jer mislim da politička prepucavanja nikome ništa dobro nisu donijela, no međutim postoje ipak dijametralno suprotna i dijametralno suprotstavljena viđenja na uzorke stanja u kom se nalazimo kao i put ka promjeni tog stanja ili popravljanju bolje rečeno. Ono sa čim se potpuno slažem u Ekspozeu je ona uvodna opservacija trenutnog uvodnog stanja u kantonu. Malo me čudi jedino što gospodin Konaković nije pomenuo i sport i kulturu kao također tačke u kojem se stvari dešavaju vrlo loše i vrlo teško ali možda da ga ne bi optužili za privatizaciju pošto svi znamo da je sport na neki način njegova primarna oblast pa ga s te strane razumijem ali onda se postavlja i nameće se pitanje ko nas je doveo a možda i važnije zašto nas je neko taj ko nas je doveo do ovakvog stanja. Kome ovo stanje ovakvo kakvo jeste trenutno odgovara? To je potpuno tačno dakle imamo jedno stanje koje jedan Gordijev čvor zla, kriminala i korupcije i ono što se ja sada pitam da li gospodin Konaković ima taj mač i da li ima dovoljno jaku ruku da taj Gordijev čvor prereže, jer bojim se da se stvari ne mogu drugačije rješavati. Previše su se zapetljale. Slušajući Ekspoze nekako sam imao osjećaj da mi se govori ono što sam baš želio da čujem. Želio bih da je to i iskreno da je to stvarna namjera. Da li mogućnosti postoje i snaga to ćemo da vidimo. Ali ja se sjećam na početku onog prošlog četverogodišnjeg mandata, imali smo jednu vrlo neuspješnu lijevo desnu koaliciju koja se pokazala nemogućom što je na neki način bilo i predviđeno, sada imamo jednu malo više lijevu i malo više desnu koaliciju i nisam siguran da su se stvari do te mjere promijenile da će ova biti toliko funkcionalna da može funkcionisati i popraviti stanje onako kako građani ovog Kantona od ove vlasti s pravom očekuju. Ono što također moram da primijetim je da se datum formiranja ove vlasti, je li danas je 23.03. na neki način poklapa sa 31.03. dakle datumom do kada se mora usvojiti budžet i bojim se da je na neki način neko namjerno odugovlačio formiranje ove Vlade tako da se izbjegne neka procedura koja bi trebala biti provedena prije usvajanja budžeta. To je dakle da vidimo nacrt pa da se provede jedna kvalitetna javna rasprava i sve ono što bi trebalo pa da bi taj budžet bio usvojen sa svim njegovim korekcijama, sa svim najboljem mogućem obliku. Sada ako ja nisam u pravu, volio bih da me gospodin Konaković demantuje, a ako jesam u pravu onda to sigurno nije dobar znak za početak rada ove Vlade. Vrlo sam pažljivo također slušao pojedinačno po ministarstvima planove i zaista sam čini mi se najviše očekivao od onoga koje je posljednje bilo na spisu gđina Konakovića, to je je li tako bilo Ministarstvo pravde, jer iz svega što se dešava, sve intenzivnije se dešava u ovom kantonu, očekujemo da tu bude stavljen akcenat na popravljjanje sigurnosti i egzistencijalne pa i svake druge građana ali na žalost čini mi se da je upravo u tom resoru bilo i najmanje riječi. U svakom slučaju, iznimno cijeneći gđina Konakovića ne sumnjam u njegove dobre namjere, volio bih da on i može sprovesti sve ono što želi, sve ideje sa kojima ulazi u vođenje ove Vlade, iako moram da izrazim skepsu da će biti u mogućnosti da provede ono što je sebi zacrtao bar u nekom stepenu koji bi bio ono koliko toliko dobar. Hvala vam lijepo.

Poslanik/zastupnik Slaviša Šućur:

Zahvaljujem predsjedavajući, pozdravljam sve koji prate ovu sjednicu. Ja ću se kratko samo osvrnuti na Ekspoze i na neki način reći kakav će biti odnos SDP-a i njegovih poslanika prema budućoj Vladi. Ovaj Ekspoze je pokazao nešto što većina ljudi koji prate rad ove Skupštine zna da za mandatara Sarajevski Kanton ima čovjeka koji je elokventan, inteligentan i koji dobro poznaje nagomilane probleme u Kantonu Sarajevo. Ono što tek treba da sudimo koliko ima istinski volju i sposobnost da se sa masom tih problema suoči i da ih rješava. Mislim da ovako dug i iscrpan Ekspoze pošto on manje više bio talog problema koji nas čekaju, da su problemi zaista ogromni. 20 godina od rata, stanje kakvo je opisano u Ekspozeu ne da se problemi nisu rješavali nego su se samo gomilali i postajali sve veći. Za dobro građana koji žive u Kanton Sarajevo, za dobro BiH, mi želimo da ova Vlada bude uspješnija od prethodne. Imamo određene sumnje jer politička volja koja stoji iza te snage je ista politička volja koja je bila iza ranijih Vlada, njihovi rezultati su bili drugačiji. Ipak mi

ćemo se držati onog pravila koje je pravilo neke političke kulture da se novoizabranim vladama ma kako kasno bile izabrane da šansa da pokažu da li je Ekspoze koji je kao svaki ekspoze budućih premijera zaista katalog dobrih namjera i dobrih želja, da li ćemo dobiti ono čemu svi težimo. Ono što je dobro je da je Ekspoze zasnovan na dokumentima koje su radile institucije koje poznaju očito dobro stanje u određenim oblastima. Dobro je što su neke vrijednosti kvantificirane, tako da će nama kao opoziciji biti mnogo lakše da pratimo rad ove Vlade i njegove rezultate jednostavno poredeći pokazatelje koji su bili na početku mandata i ono što se će se dešavati u narednom periodu. Dakle evo, mi ćemo ocjenjivati rad ove Vlade, ponašati se shodno konkretnim potezima koje bude vukla a ne na osnovu onoga što smo imali priliku da čujemo, opet kažemo kao ekspoze dobrih namjera. Hvala.

Poslanik/zastupnik Ismir Jusko:

Pozdravljam predsjedavajućeg, uvažene kolege, mandataru, kandidate za ministre i gledaoce ispred naših malih ekrana. U ovom momentu dok mi sjedimo ovdje, u našem kantonu neko ostaje bez posla. Neki otac gleda svoje dijete kojem ne može da priušti ni jednu čokoladu za njegovu užinu u školi. Naše mlade majke kroju trudnoću zbog toga što ne smije da ih vidi gazda da ne bi ostale bez posla. Ima li veće ironije da naši saborci kažu nakon 18 godina od rata da im je bolje bilo živjeti u ratu nego što im je sada u miru. Mladi ljudi nam odlaze, erozija kadrova je evidentna već više od deset godina. Drugi prepoznaju kvalitete naših mladih ljudi dok mi to ispuštamo. Dragi mandataru, uvaženi kandidati za ministre, ispred vas je izuzetno težak zadatak. Budite uvjereni da ćete od nas imati apsolutnu podršku da svaku vašu ideju, svaku vašu inicijativu, sve što budete uradili za korist građana ovog Kantona, mi ćemo javno pohvaliti. Također, budite uvjereni sve što ne bude dobro da ćemo mi to javno kritikovati, nikada od nas nećete imati opstrukciju. Mi nismo dio negativnih konotacija, mi želimo da bude dio rješenja. U tom kontekstu želim vam uspješan rad a mandataru želim puno sreće sa iskrenom nadom da sve ovo što je pobrojao, a pobrojao je maltene 90% toga će riješiti i da će on biti pionir u stvaranju novih uslova za život svih naših građana u Kantonu. Hvala vam.

Poslanik/zastupnik Sabina Ćudić:

Dobar dan svima. Zahvaljujem se budućem premijeru na Ekspozeu, i krenula bih od dvije stvari sa kojima se apsolutno slažem sa gđinom Konakovićem, gdje je kao prvu stvar iznio apsolutno izgubljeno povjerenje građana Kantona Sarajevo u ljude koji ga vode. A kao jedan od načina rješenja tog problema je rekao da ćemo staviti interes građana ispred stranačkih i ličnih interesa što također podržavam. Mislim da bi bilo neozbiljno sada ulaziti u detalje Ekspozea zato što, naravno, nismo ga dobili unaprijed i on sadržava toliko elemenata da bi smo mogli danima da ulazimo u te detalje, ako ne i mjesecima, ali ćemo imati prilike za to. Tako da samo bih kratko rekla gotovo u oblasti sa kojom je krenuo kao prioritonom o obrazovanju, mislim da nisu detektovane prethodne stvari koje je prethodna Vlada detektovala i prethodni premijer koji je detektovao u svoj izlaganju od prije dva mjeseca a gdje stoje neki zabrinjavajući podaci o elementima finansijskog kriminala zapošljavanjem mimo odobrenja Vlade itd. Također u oblasti kulture mislim da je navesti jednu mjeru popis glumaca dosta neozbiljno, ali kažem, imat ćemo priliku da se bavimo detaljima. Ja bih da naglasim da na žalost ili srećom kako ko gleda, Vladu ne čini premijer, čine je ministri koje danas nadam se u svom ekspozeu predstavljao i moram primijetiti nekoliko stvari koje su bile i predmet diskusije rekla bih javne iako na žalost materijale za koje smatram da su najvažniji materijali koje ćemo ove godine vidjeti, a to jesu biografije i program rada koji na žalost nismo dobili ove Vlade, dostavljen prije svega četiri dana. Postavlja se pitanje koje i javnost postavila da li je Vlada u ovom sastavu, posebno većina predloženih ministara i ministrica čije diplome, čije postojanje diploma kao i sadržaj tih diploma izuzetno upitan da li je kvalifikovana da obavi ovako ambiciozan posao koji nam je premijer predstavio. Također bih navela da je za veliki broj kandidata i kandidatkinja zabrinjavajući

nedostatak bilo kakvog iskustva, radnog iskustva u resorima koje trebaju predvoditi i u kojima trebaju sprovesti ovako ambiciozne reforme. Konačno, nedostatak programa naravno koji ili bilo kakvog javnog iskazivanja u prošlosti i u ova protekla četiri dana od strane kandidata vezano za resore koje trebaju predstavljati što naravno na žalost baca sumnju i na one kandidate i kandidatkinje čije biografije ispunjavaju minimalne uslove za funkcije koje trebaju obnašati, pa su se na žalost našli u društvu onih koji te funkcije sasvim sigurno ne zaslužuju. Konačno, postavila bih pitanje s obzirom da se u ekspozu ministara ako sam dobro prebrojala možda griješim, ponavljam bilo je jako mnogo detalja, spominje se osnivanje barem tri nova fonda i ja se iskreno nadam da će budžet koji moramo usvojiti do 31. ovog mjeseca reflektira osnivanje tih fondova i koristim ovu priliku da postavim vrlo konkretno premijeru budućem a to je kada počinje i koliko će trajati javna rasprava o nacrtu budžeta koji se nadam da ćemo dobiti već sutra. Hvala.

Poslanik/zastupnik Semir Halilović:

E hvala vam lijepo. Pozdravljam sve prisutne, čestitam mandataru na Ekspozeu. Inače to je svima nam je poznato opšti dokument koji šire gleda na probleme u Kanton Sarajevo i gospodin Konaković je u vremenu u kojem nam je svima na raspolaganju uradio ono što je bilo moguće. Ono što bih ja želio da pitam mandataru s obzirom na količinu budućih reformi koje su najavljene i koje bi se trebale provoditi, a same reforme one su same po sebi sukob sa određenim centrima moći. Kada god pravite reforme vi se zapravo sukobljavate sa mnogim interesnim grupama kojima reforme nisu u cilju. Jer reforma znači uvođenje sistema. Pa je pitanje pod broj jedan: koje su naše odnosno vladine, skupštinski realni kapaciteti da izvršimo pod broj 1 dekiriminalizaciju određenih struktura unutar Kanton Sarajevo, jer opšte je poznato da je korupcija jako puno zahvatila funkcionisanje javnih institucija ovdje i pod broj dva: zanima me da li ćemo moći uvesti ozbiljan stepen profesionalizacije u onim institucijama a ova dva segmenta su povezana koji obezbjeđuju provođenje prava i pravde unutar Kantona Sarajevo. Jer to je vrlo složen zadatak. Mi se možemo deklarativno boriti da i možemo svi zajedno ovdje ispasti ili pobjednici ili svi zajedno gubitnici. Jer niko odavde neće otići sretan ako ova Vlada ne uspije. Kao što niko nije bio spreman ako nije bio ispunjen Ekspoze ni prethodne Vlade. Jednostavno ljudi očekuju ovdje da žive bolje i samo neki od stvari koje treba da radimo su preteške već u startu i kada se pomisle na njih. Problem Kliničkog centra je strašno veliki. On je i političke prirode nije samo formalno pravne prirode. Problem Grasa ista vrsta problema. Zato bih želio da mandatar odnosno budući premijer u svom radu želio bih mu poželiti svu sreću iz prostog razloga i pružit ćemo mu svu podršku za svaki reformski korak koji će zaista promijeniti sistem dosadašnjeg funkcionisanja određenih oblasti u Kantonu Sarajevo a koji su doveli do ove dokle jesmo kada su potrebne reforme. Situacija da je šteta od privatizacije šest puta veća od ratne štete dovoljno govori da se nije ozbiljno radilo ni pošteno od sada. Vi ste mlad čovjek i ja vjerujem da vi nećete dozvoliti da kao mnogi drugi za rad jednog mandata žrtvujete što kažu obraz. I imate moju podršku. Hvala vam lijepo.

Poslanik/zastupnik Kemal Ademović:

Uvaženo rukovodstvo, koleginice i kolege zastupnici, članovi Vlade obadva saziva, predstavnici javnih institucija, ustanova, sindikata, dragi gledaoci, sve vas selamim i pozdravljam. Dakle, prije svega želim da čestitam premijeru Konakoviću na hrabro, hrabrom istupu najavi kroz sveobuhvatan Ekspoze reformi borbom protiv korupcije, racionalizacijama, uštedama itd. i ja vjerujem da će on te procese pokrenuti. Ekspoze je primjer i društvenim prilikama i ekonomskim prilikama i vremenu u kojem živimo. I sveobuhvatan je. I svakako svaki ekspoze može biti i širi i užu ali ovaj zaista daje puno. Obzirom da se prihvatio kandidature u vremenu kada se kasni sa imenovanjem Vlade kada se kasni sa donošenjem budžeta ova 2015 će za ovu Vladu biti zaista teška da uhvati korak sa nagomilanim problemima koji su u Kanton Sarajevo evidentni a njih ne trebam ponavljati. Dakle premijer je u Ekspozeu iznio najveći dio tih problema. Uvjeren sam da će premijer a i ova Vlada koja će ga pratiti iako jedan broj ministara ne znam, ali vjerujem da su političke stranke ozbiljno odvagale kada su predlagale kandidata za ministra da će se uhvatiti u koštac sa problemima i sa

reformama koje premijer najavio. Zato dajem svoju punu podršku i kažem da ću podržavati tu Vladu i premijera sve do onda dok oni budu radili u interesu građana i dok budu nastojali da ovo stanje koje sada imamo da se popravi da dođu bolji dani. Hvala.

Poslanik/zastupnik Edin Forto:

Dobar dan svima. Ja prvi put govorim i mislim da je vrlo dobar povod za to. Gospodine Konakoviću vaš Ekspoze volio bih da smo ga dobili ranije da možemo malo bolje odmah zauzeti stav i politički stav a i lični stav prema onome što smo čuli. Međutim slušajući vrlo pažljivo, htio bih prvo naglasiti par stvari koje su stvarno odlične. A to je identifikacija sektora koje mislite podržati. Govoriti i to pet puta ponoviti da ćete podržati turizam, IT sektor i metalski sektor je nešto što može biti samo za pohvalu. Isto tako nekoliko puta ste ponovili principijelnu opredijeljenost prema rezanju troškova i potrošnje ove glomazne administracije koja vodi Kanton. To je također nešto što možemo samo pozdraviti. Međutim kada ste išli od ministarstva do ministarstva detaljno ovi principi se nisu mogli baš projektovati. Znači, vi ste sami rekli metodologiju pisanja svog ekspozea. Vi ste rekli da ste kada ste išli po ministarstvima dobili od svojih budućih ministara materijale. Neki ministri i ministrice poput onoga što smo čuli mjera u zdravstvu očigledno je da je osoba koja vam je to poslala ima jasnu viziju šta želi da uradi. Neki drugi kandidati za ministre i ministrice nisu napisali gotovo ništa i vi ste sada ostali sa timom koji možda i nema kapacitet da uradi sve ono što ste nabrojali. Nabrojali ste jednu listu želja što je kolega već pomenuo, ali vrlo malo rješenja, konkretnih rješenja ste ponudili. Isto tako kada kažete da kolegica Ćudić je rekla da bar tri fondacije predložene. Također i predložene su i neke agencije i direkcije. Ako formirate agenciju za javni prijevoz očekujemo objašnjenje koji su to ljudi i da li će to dalje povećati ovaj glomazni, administrativni aparat koji trenutno imamo. Dakle ono o čemu govorimo je da lista želja nije upoređena sa listom rješenja kako to mislite uraditi. Naveo bih jedan primjer koncesije u saobraćaju. Kako može Kanton raditi koncesiju u saobraćaju. Hoćete li nam naplaćivati prolaz kroz tunel Ciglane ili ćete sagraditi prvu transverzalnu pa ćete naplatiti posebno vožnju tom transverzalnom. Znači to su stvari koje su samo nabrojane i koje bi trebale možda da pokažu vašu dobru volju. Ali ono što mi se čini da niti ste vi imali vremena niti smo mi imali vremena da dobro proanaliziramo dokument koji ste nam ponudili. Želim vam puno sreće ali ja mislim da ovo što ste vi iznijeli je ustvari više čin hrabrosti nego čin nečega čemu se mi trebamo radovati. Hvala.

Predsjedavajući:

Zahvaljujem uvaženom zastupniku Forti. Ukoliko se niko više ne javlja za riječ, zaključujem raspravu a pozivam zastupnika, budućeg mandataru Konakovića da odgovori. Budućeg premijera.

Poslanik/zastupnik Elmedin Konaković:

Evo od kraja ćemo, od ovih najsvježijih. Zakon o koncesijama ne opterećava krajnje korisnike. Zakon o koncesijama u saobraćaju znači da se možemo opredijeliti da sve licence taksi, čiji status ne znamo, čije su, pa imamo strašni raskol između onih u pravnim subjektima i samostalnih taksi prevoznika u tome koliko ko koristi tu licencu, možemo donijeti odluku da svaku licencu damo na koncesiju. Odredimo njenu cijenu, iznos uslove korištenja. Nema veze sa krajnjim korisnikom niti će se neki prolaz kroz tunel naplaćivati. To kaže naš Zakon o koncesijama. Vi ćete ga iščitati sada kada ste formalno zastupnik, siguran sam da će vam on biti jasniji. Na isti takav način možemo koncesije dati na određene saobraćajne linije u Kanton Sarajevo. Koncesije na korištenje čak i šina i pruge. To su koncesije. Nisu koncesije to da ljudi plaćaju ne daj Bože. Namete prema građanstvu nismo spomenuli u ovom Ekspozeu. Nemojte sumnjati u ovu Vladu Kantona Sarajevo. Sve što vi pokušavate na određeni način problematizirati. Ima dosta ljudi ja to tako gledam su određene u politici prednosti. Dakle, to što su ljudi potpuno u najvećim dijelom prijedloga novi, svježiji je za mene prednost. U odnosu na neke politički potrošene likove, dugogodišnje i moje i vaše stranačke kolege koje su dugo radile na tim pozicijama a nisu postigli rezultate ja bih birao novijeg. I onoga ko do sada nije imao politički kredibilitet a posebno ne neku hipoteku. Dakle to što problematizirate hoće li oni biti kompetentni, dajte im vremena, kao što ste najavili da ćete dati vremena i meni i njima neka

se to pokaže. Kada kažete fond. Teško je bilo slušati moj Ekspoze sat vremena i biti koncentrisan, ja sam preskočio desetak stranica. Desetak sam ih preskočio, vidjet ćete šta sam sve preskočio da ne bih potrošio previše vremena, da ne bih bio duži od ovih viših institucija, mogao sam ovdje još duže. Reći ću vam šta sam to punudio oko rješenja, propustili ste da čujete. Ili recimo čujete vi da se trebaju osnovati tri fonda a ne čujete da ćemo uvesti moratorij na zapošljavanje. Znači te su dvije stvari povezane. Nećemo u nove fondove zapošljavati nove ljude i nema troškova nove administracije. Ljude ćemo premještati sa nefunkcionalnih radnih mjesta na ona radna mjesta u kojima će biti funkcionalni. Dakle to su spojive stvari i u ovom Ekspozeu i kompletnom tom konceptu. Kada govorimo o uštedama i količini novca koji koristimo, evo ja sada, vratit ću se na to zdravlje. Uštede i racionalizacija na ovom budžetu ovakvom nećete ga naravno dobiti u javnoj raspravi, vi to znate, nema javne rasprave do 31. niti će ona moći. Javna rasprava ima svoj proces. Znači i to ćete vidjeti kada se pošalje u javnu raspravu pa pošaljete primjedbe, pa Vlada ima nekoliko dana da se one sublimiraju, pretvore u onome što je formalno prema Vladi pa se to donese vama, pa onda imate amandmane, naravno da taj period nećete imati i mislite li vi da meni ne b i bilo draže da smo mi to napravili nekada u decembru? I mislite li vi da svima vama ne bi bilo lakše da smo to nekad napravili u decembru a mogli se nas 18 ovdje naći i mi hoćemo i odmah i sad i sutra i evo imena naše Vlade. Nismo. To su politički procesi. Prošli je trajao 16 mjeseci na nivou države i toliko nas je koštalo da su posljedice nesagledive. Nije šest nije ni pet, nego je 4 mjeseca od kada mi ovdje formalno radimo. 11. novembra smo mi ušli u ovu skupštinu. A prije toga smo u starom sazivu imali nekoliko sjednica. I vi ste pokazali svoju ozbiljnost, pa ste radili, radili smo i na prijedlogu tog rebalansa budžeta. I na hitnim mjerama sačuvanja ovog zakona o raspodjeli javnih prihoda. Nismo bili neozbiljni što politike u BIH tako funkcionišu da se nije lako dogovoriti, često stavljajući interese lične, političke, zanemarujući i državne i nacionalne, meni bitne, prođe nam vrijeme ne napravimo koalicije, čekamo. To je proces u BIH poznat i mi smo ga ostavili po strani, nego ćemo se fokusirati na ono što je naš zadatak i naš dio posla. Reforme znače naravno sukob sa određenim centrima moći kad god i gdje god da radite. U malom preduzeću kada pokušavate istjerati neku svoju pravdu to sigurno znači sukob sa nekim centrima moći. Ja imam jedan životni problem, meni je sukob sa mojim moralnim ljudskim i vjerskim principima mnogo bitniji i važniji. Ne volim biti sa sobom u sukobu ni u moralnom ni u ljudskom, posebno ne u vjerskom dijelu. Tako da ću se opredijeliti za ovaj drugi. Znači vjerovatno ću biti u sukobu s nekim i svi mi koji budemo zagovarali te reforme, ali eto na to se nećemo baš previše obazirati. Vaše nadležnosti u borni protiv korupcije su svakodnevne. Vi kao zastupnici možete i moj Ekspoze dopuniti. Možete ga dopuniti formalnim prijedlozima onoga što smatrate da treba biti dio ekspozea premijera. Ja ću napraviti poseban odjeljak. Sačekat ćemo četiri pet dana, pa ću napisati prijedlozi zastupnika na Ekspoze premijera i uvrstit ću ih i takav ćemo ga objaviti kao dokument na stranici Vlade. Dakle eto uradite to. Hajmo sačekati sedam dana, dajte mi prijedloge, ja ću ih formalizirati i reći u svom nastupu opaske su bile te, prijedlozi mjera su to. Ja kao mandatar prihvatam bez obzira iz koje političke partije vi dolazite sve što je konkretno i korektno ja vas čekam vi mi pošaljite i bit će dio mog ekspozea koji ćemo zajedno analizirati četiri godine. Kada ga prihvatim i okačim znači da analizirate jesmo li ga uradili. I slobodno ga analizirajte i prozivajte ako ga nismo uradili. Neka to bude naš prvi zajednički veliki korak. Naravno da je problem u institucijama koje se bave implementacijom ovo je gospodin Halilović, ove stvari su sada odgovor njemu. Dakle sigurno da postoje ljudi u tim ustanovama, institucijama sudovima, tužilaštvima a dijelom odgovor i mom kolegi Solakoviću onoliko koliko je naša nadležnost ja sam ih se dotakao u ekspozeu. Rekao sam da ćemo tražiti odmah obnovu nekih procesa. Mi smo pokazali odnos prema našem pravobranilaštvu, prema našem Tužilaštvu, prihvatajući te izvještaje, obarajući izvještaje, aludirajući na procese i propuste koji se tamo dešavaju i na žalost nemamo tu puno prostora. Mi sudu i na Tužilaštvu možemo pisati pisma i čekati šta će VSTV poduzeti kao mjere protiv ljudi koji su u tom sistemu neodgovorni. Ja ću čak vjerovatno prelaziti granicu dozvoljenog pritiska na sudstvo i Tužilaštvo tražeći da oni rade one procese i otvaraju procese koji su i nekoliko puta sam to također ovdje u Ekspozeu napomenuo akcenat na procese privrednog kriminala. To su rješenja. To su također rješenja. Dakle akcenat u

policiji, u Ministarstvu pravde u opštim ocjenama, primarno na procese privrednog kriminala uz činjenicu da u tom odjelu kantonalnog tužilaštva nema uspješno realizovanih procesa u zadnjih nekoliko godina. Niko ne leži u Kanton Sarajevo zbog počinjenih malverzacija u segmentu privrede, i akcenat je i piše i tražit ćemo. A naravno kao jedan od faktora je ja nisam znao da su baš veće štete privatizacijske od ratnih ne sumnjam u to i zvuči mi logično da su ogromne i to je jedan od argumenata zašto ćemo to raditi. Ono što vi od mene tražite ovdje da deminiram da imam mač da imam ruku, a eto. Ako bude trebalo mi ćemo to i deminirati i mačevati i sve što vi, vi kažete hoće li imati premijer. Probat ću i to ako bude potreba. Sport i kultura realno jesu malo manje prezentirani u ovom Ekspozeu i to jeste moje lično opredjeljenje. Da ne dajemo u samom ekspozeu u toj širini uz objektivnu moju opasku ličnu, da u ovim drugim segmentima koje smo malo više razrađivali a ja stvarno sam ovaj ekspoze mogao sa prijedlozima rješenjima mjera i rokovima vam dati pa otići na odmor onda i ne moramo ništa ni raditi, zadatke podijeliti i otići. A reći ću šta sam to i ponudio. Kažete nije bilo rješenja. Bilo je dosta rješenja. Samo nije bilo rokova i izvršilaca. To je pod zadatak Vlade. Mi ćemo odmah podijeliti zadatke, preuzeti obaveze odrediti rokove, izvršioce i vrijeme. Dakle to su stvari koje su naš posao dnevni. Nisam mogao ovdje u sat vremena i sat je možda previše za kantonalni ekspoze ali eto ja sam ukrao vama to nekih 15 minuta od nekog protokola da bih predstavio i preskočio desetak stranica. Isto tako činjenica. Zašto pravda na kraju. Ja sam također rekao nisam pravio selekciju važnosti nego sam rekao kako to treba da počne u obrazovanju a također sam napomenuo da neke od ovih mjera se prožimaju kroz sva ministarstva. Kroz Ministarstvo pravde i uprave prolaze svi dokumenti koji rade sva ministarstva i ono što vi radite u Skupština Kantona Sarajevo Zakonodavno pravna komisija, Pravobranilaštvo, Ured za zakonodavstvo, Ministarstvo pravde su organi i primarno Ministarstvo pravde koje o svako aktu mora dati pozitivno, negativno mišljenje, ukazati upozoriti uraditi. Ja sam se dotakao samo dio izmjena i legislativa koji su alati i pretpostavke. A govorio sam o njima i primarno. Dakle govorio sam o alatima koji se ne koriste. Kada kažem da se ti alati ne koriste treba li da napomenem da kažem mi ćemo koristiti alate pa da kažete ponudili ste rješenje. Ja mislim da ne treba vama barem. Gospodin Šućur nije tražio odgovor čini mi, ja se slažem potpuno sa političkim stavovima i to je vrlo konkretno i naravno očekujem da na isti način kod ekspozea i kod ostalih procesa na isti način saradjujemo. Da sve što imate eventualno prijedloga mjera iz vašeg iskustva, iskustva vaših kolega dugogodišnjih aktera na političkoj sceni dobrih kadrova imate uvijek otvorena vrata da za svaku od ovih mjera ako mislite da ima neki bolji put, ja mislim da niko od mojih kolega i ja nećemo imati problem da taj bolji put prihvatimo i eventualno neke od ovih modela prijedloga promijenimo. Ja naravno znam kolega Jusko četiri godine sam bio zastupnik u Skupština Kantona Sarajevo. U zadnjih godinu i pol dana sam imao oko 350 CV ljudi koji traže posao u mojoj kancelariji. Uglavnom ljudi kojima se ne može puno pomoći a objektivni su im zahtjevi. Vrlo rijetko neko dođe pa vam kaže nešto što nije istina. Da je takvo stanje u boračkoj populaciji, ja iz iste dolazim. Sa svojim kolegama saborcima komunicaram, sa gđinom neću spominjati imena, bivšim ministrom sam radio na tom problemu poboljšanja statusa trudnica, njihovog statusa u želji za većim natalitetom neke mjere koje smo poduzimali imale su efekta neke nisu. Dakle svega toga svjestan, ja naravno očekujem da ćete podržati to što predlažemo kao kvalitetne mjere a naravno da sam svjestan težine zadatka koji me ovdje čeka i pristao sam na to iz komocije za zastupnika sa aspekta sigurnosti radnog prava, četiri godine sigurnog mandata pristao sam da budem ovdje ispred vas izložen svakoj vrsti kritike i prijedloga. Posebno dijela javnosti medija koji će sve što ja budem radio vjerovatno negirati, dobro ili ga barem neće objaviti i ja takav javni život živim predugo i svjestan sam i davno mi je prestao biti bitan ondje gdje nije istina a ono što je istina prihvatam kao dobru kritiku i od vas i vaših kolega posebno eventualno neki prijedlog koji još jednom ponavljam bi mogao biti bolji od ovoga što smo mi za sat vremena ispredlagali. A predlagat ćemo vam u narednim periodima sigurno toga puno više i konkretnije. Za ove fondove kolegica Čudić kažem da su to planovi koji jedan od njih, neki procesi se dešavaju. Fond za zaštitu okoliša bit će fond koji je formiran u saradnji sa federalnom vladom i bit će vrlo brzo operativan i vrlo brzo će imati zakonska sredstva koja se mogu koristiti a ideja nam je da taj fond i recimo još neki fondovi kroz ovu integraciju kroz Ministarstvo

obrazovanja i proizvodnju kadrova koji nama kroz te fondove mogu donijeti svjež kapital da ga ne tražimo samo uštedama da napravimo napokon jedan projekat sa nekom IT firmom, ekološki, apliciramo prema nekom IP fondu i dobijemo novih deset, 12.15, 50 miliona KM i upotrijebimo ih za dio sanacije ovog potrošnje čvrstog goriva u Kanton Sarajevo sa ciljem ekološkim da bude čist i zdravi zrak jer svjetski fond za ovaj dio održavanja očuvanja planete zemlje iznosi 60 milijardi dolara. I nije nepristupačan. Dakle nije nam ni tu želja otet ćemo od nekoga i dat ćemo u taj fond pa ćemo kroz fond. To nam je želja. Dakle da kroz tu vrstu operativnijeg postupanja iskoristimo ono što BiH, posebno Kanton Sarajevo još uvijek ne koristi. Sigurno da u obrazovanju postoje ti strašni problemi, uz status. Status trenutno u obrazovanju je loš ljudi koji tamo rade. Radni ambijent je loš a naravno da istovremeno imamo podatke i činjenice koje ukazuju na veći broj nastavnika i profesora u srednjim školama, na manji broj učenika u oba segmenta, to je tačno. Dakle kada sam govorio o tome da nam trebaju sindikati kao objektivan pregovarač o problemu ne očekujemo da nam dođu i kažu ima nas 400 viška i nađite nam pare i ne zanima nas. I to je ta rečenica u kojoj piše jer taj epilog ni za koga od nas nije dobar. Nego treba da kažu je li primarno interes status nastavnika njegova plata ili je interes da vas ima 400 viška sa manjim brojem radnih sati i da imate jak sindikat. Ja mislim da predsjedniku sindikata to ne može biti interes. To je naš put i zadatak za ministra obrazovanja mene i cijelu Vladu da taj dio dovodimo u red. Ja sam najviše govorio i ovdje sam isto apostrofirao a i to je rješenje o ekonomskom dijelu integracije UNSA. Jer mi znamo šta je sa 65,5 ili 66 miliona KM koje mi dajemo ali ne znamo šta je sa onih 100 i jednim dokumentom koji nam je možda promakao u proteklom mandatu, fenomenalnom koji je Kozadra uradio, raščlanjenim do toga da znate koliko se u akademskoj zajednici na fakultetima više troši para na grijanje, više para na printanje na svaki detalj za razliku recimo od JU ili osnovnih škola i tu je enorman prostor za uštede. Kada preuzmemo kontrolu, rekao sam ovdje još jednu mjeru i to je rješenje, svi na trezor. Ili ja bih volio da nam akademska zajednica ponudi bolji model. Znači ja očekujem da nam akademska zajednica bude pokretač ne samo rješenja svog problema nego da kažete to što hoćete sve na trezor ne znači to naravno da treba ekonomski fakultet koji je stabilniji interesantniji bogatiji da mu treba uzeti sve novce, ja nisam za ravnomjernu raspodjelu. Model hrvatskog obrazovanja je odličan u kom se procentualno onima koji su najbolji ostaje njihov status da su najbolji da imaju najviše novca. A drugi procenti se troše na solidarizaciju sa fakultetima koji sporije ili teže dolaze do novca i za razvoj nauke. Dakle za razvoj nauke za ta tri segmenta se troši taj višak kapitala u obrazovanju. Mi do sada nismo imali hrabrosti da ga otvorimo. Mi najavljujemo hrabrost da ga otvorimo. Kako će to rezultirati da ja kažem mi ćemo za tri mjeseca to završiti. To ne mogu reći. Niko od vas to ne može reći. Da ćemo u to krenuti, mi ćemo u to odmah krenuti. I svjesni smo naravno tih problema kao što očekujemo da sa sindikatom nađemo način da plata bude bolja jer je nemoguće da im na tužbe koje su još uvijek aktivne udovoljimo da na zahtjeve koje sada imamo udovoljimo i da ispoštujemo osnovice i ono što oni od nas traže jer tog novca nema. I drugo nije korektno i nije pošteno. To na taj način nećemo raditi ali ćemo sa njima tražiti. Mi nudimo model ako imamo bolji model pristat ćemo i na bolji model i u osnovnom i u srednjem obrazovanju svjesni da su oni jedan od najbitnijih dijelova ovog sistema. Ne da ja nemam hrabrosti reći da policija ne radi nego ja imam hrabrosti reći da policija odlično radi u ambijentu u kom živi. Ja imam hrabrosti to reći. Da tamo ima još problema vjerovatno pojedinaca koji tamo loše rade svoj posao da tamo moguće ima i korupcije i kriminala to nije ništa strano, niti je neka pojava koja u svijetu nije primijećena ili poznata. To je sigurno tako. Ali ovaj stepen otkrivanja počinitelaca krivičnih djela, procesuiranja hapšenja, sprovođenja privođenja a onda za 24 sata ponovo počinioci krivičnih djela na cestama rade iste stvari. Nedostatka zakonske legislative dijelu zakona koji se odnose na maloljetno delikventstvo dakle su zadaci koji nisu na teret policije. Da li je policajac uvijek ljubazan ili nije ljubazan, namršten ili nije namršten i to je naravno za priču il zaustavi il ne zaustavi u saobraćaju pa se predstavi il ne predstavi. Sve su to stvari na kojima se treba raditi svakodnevno. Ja ne amnestiram one koji tako rade. Ali ja mislim da policija Kantona Sarajevo uz stepen opterećenja uz 11 različitih policijskih agencija koje ovdje egzistiraju njihovu nekoordinaciju, ono što se dešava u proteklom periodu radi svoj posao maksimalno korektno koliko je to moguće. Tamo gdje vidimo da nije, ili gdje vi znate da nije odmah ćemo ući u

sukobe i u rješavanje i takvih problema. I to i vi i mi za takve stvari moramo imati hrabrosti čak i kad je riječ o policiji. Evo dotakao sam se ovo je već kolegici Filipović odgovori. Potpuno je tačno veći broj nastavnika u osnovnih školama manji broj učenika, parametri koji to pokazuju, sve to ukazuje i proizvodi loš status uz nedostatak sredstava loš status ljudi koji su osnovni pa onda dolazimo do toga neko je rekao 40 ih je tehnički onesposobljenih nepismenih. Nisam znao. Gospodin Marić čini mi se to je rekao. To je neki podatak koji bi nam mogao možda malo nekada objasniti. I proizvodimo možda kadar koji nije dovoljno stručan zato što se onda za tu profesiju ili u tu profesiju angažuju ljudi za drugačiji a ne na taj odnos i mjerilo kvaliteta i to je sigurno činjenica. I zato kažem i to su rješenja. To je apsolutno opravdana konstatacija i kao što je opravdana u ovom dijelu akademske zajednice jer ovdje piše isto u uvodu da vam i to ne ponavljam. Dakle, neravnopravnog statusa, naći ću ga, sačekajte me samo sekund. Onog dijela asistenata i profesora s manjom platom i profesora sa ovim velikim platama. Pa naravno da znamo. I o tome sjećate se svi smo mi ovdje o tome pričali samo što sada imamo alate da se time bavimo. Ja barem, do sada sam imao alat da govorim kao vi, sada imam alat da nešto uradim i da vi ocijenite. Jel ono što sam ja govorio u ovom i u onom prethodnom mandatu mjerljivo ili kompatibilno onome što radimo. To je u suštini i vaš posao i moja zadaća da pokažem da jeste. Kako osigurati sredstva za nauku? Evo dijelom sam odgovorio. Dakle ulaskom potpunim u analizu ekonomskog stanja i finansija na UNSA: mi smo napravili jedan bitan korak integracije. Dobili smo jedinstven UO, dobili smo reorganizaciju koja se u tom dijelu ekonomije nije još uvijek primijenila i čekamo da se primijeni. I tražimo da se primijeni. I u njoj naravno ima novca za razvoj nauke. I fonda za nauku i ovog fonda koji će stipendirati ono što je naše opredjeljenje Zlatne značke i najbolji studenti generacije a sa ciljem da nam takva djeca ne idu van BIH. To je jedna od mjera koja treba da ih zadrži ovdje. Druga mjera je ta prekvalifikacija i sigurno radno mjesto. Evo ponudili smo nekoliko modela Zavodu za zapošljavanje, Ministarstvu obrazovanja, novac. Umjesto što plaćamo njihove doprinose ili ostvaruju svoja prava u dijelu zdravstvenog osiguranja taj novac investiramo u razvoj njihovih malih obrta u razvoj njihove prekvalifikacije za sektore za koje vidimo da ima radnih mjesta. I to su rješenja. Jedan inspektor normalno da nije dovoljno. I to je onaj dio kada sam rekao alati. Kantonalna inspekcija. Pa nabrojao sve inspekcije ako ste čuli koliko ih je. Nabrojao sam ih da čujete koliko to ima ljudi koji bi trebali kontrolisati divlju sječu šume ili eventualno kvalitet nastavnika u osnovnoj školi a ne rade to. Šta je rješenje? Da ja izmislim nekog novog japanskog inspektora. Nije. Nego da te koji su u sistemu iskontrolišemo, natjeraju da rade napravimo evaluaciju njihovog rada, znanja, pokažemo vama povećali smo tu stopu sa 5 na 15, na 30, na 50 i popravljamo stanje. To je naš posao. I to su mjere i to su rješenja. Nisam se kolega Solakoviću dotakao onog dijela kako bih ja uređivao Tužilaštvo i sudstvo da mogu a ne mogu. Niti mi to možemo. Dakle ne možemo mi ni u Tužilaštvo ni u sud ne daju nam ljudi. A jesam pet puta ponovio, privredni kriminal, korupcija u društvu, korupcija u javnoj upravi, borba protiv svega toga nabrojanog u svakom segmentu svaki. Šta to znači? Naravno da znači upotrijebiti tu policiju za koju ja kažem da će pomoći, tu Ministarstvo pravde za koje kažemo da ćemo popraviti onu legislativu koja eventualno fali predlažući je vama a vi možda bolje odgovore nego što mi ponudimo pa ćemo zajedno napraviti posao da ne bude maloljetnik sa 17 godina i 10 mjeseci pušten sutra za teško krivično djelo. I to su zadaci. Dakle u onaj segment donošenja odluka i brzine rada možemo uticati kada im na budžetu odvojimo eventualno još 15 novih mjesta a kada nam oni pokažu da im to zaista treba i da će biti efektivniji. Kada nam pokažu da ne treba. Znate li da je bio prijedlog da se zatvori u kantonalnom Tužilaštvu odjel privredni kriminal. Bio je prijedlog da se zatvori a ne da ga nisu zatvorili nego smo mi uspjeli nekim pritiskom sada ga revitalizirati pa ja mislim da će brzo biti nekih reakcija iz tog dijela koji će pokazati da smo nekako uspjeli. I kada im damo još pet ili sedam ili devet novih tužilaca i tražimo da rješavaju to ili da rješavaju brže ovaj segment komunalne privrede i naplate jer tamo hiljade i hiljade tužbi za neplaćene račune ljudi koji to mogu platiti stoje nikada se neće naplatiti jer je to ko biva preobimno i preveliko. To je naš dio gdje se miješamo u rad tužilaštva i sudstva. Odobrit ćemo sredstva zaposlit ćemo i onda pitati gdje su rezultati za to što smo odobrili i što smo zaposlili. Mogao sam svako od preduzeća ovdje raščlaniti pa reći sljedeće, u Toplanam, Grasu, ZOI u su komunalni problemi. Ni u jednom nisu isti.

U Grasu je problem ljudski faktor broj 1 po mom mišljenju. Štampa kontrola karata rekao sam da ćemo je preuzeti i ona će odmah dati rezultate ona je rješenje. Na dva mjesta gdje smo to uradili povećali kontrolu naplate smo 700% povećali prihod. Tamo gdje nismo uspjeli sada ćemo to odmah uraditi. Preuzeti kontrolu štampe i prodaje i mi ćemo brojati koliko je dole prodatih karata i koliko je naplaćenih sredstava i tražit ćemo one a znam da ih ima personalno, koji tu poziciju zloupotrebljavaju. Toplane nemaju isti problem a dijelom imaju isti problem ne ekonomske cijene karte jer mi subveniramo i penzionera sa 300 i penzionera sa 1700 KM penzijom na isti način. U Toplanama subveniramo i sa prihodima 10.000 i sa prihodima 300 KM na isti način. I to su rješenja. Neovisni odbor koji donosi novu tarifnu politiku, objašnjava njenu ekonomsku primjenu a mi iz nje crpimo sredstva za socijalna davanja je rješenje i u Toplanama i u Grasu i ostalim segmentima. Evo u vodi smo imali jednu avanturu pa smo povećali pa izgubili onaj kredit EBRD i ne znamo tačno stanje šta su nam efekti povećanja te cijene a imamo i dalje te famozne redukcije i imamo i dalje rasipanje vode do 70% nismo rekonstruisali ni tu vodovodnu mrežu. Najavili smo kredit EBRD-a kao jedno od rješenja. Nakon što dobijemo, znate zašto nismo realizovali, zato što u tom obrazloženju nije menadžment ponudio kvalitetan elaborat da ta sredstva povučemo. Znate šta je rješenje? Kvalitetan menadžer na čelu takve firme. Nema drugog. Ili vi ako imate drugo odlično odmah ga stavljamo i idemo u implementaciju sa zadatim rokom. Neću ovo ima li jedinstvena, koalicija, snaga gdje ko. To neću dalje to su politička pitanja. Ovim ljudima koji su se hrabro prihvatili ove funkcije niko od njih nije došao nezaposlen, nezbrinut, niko nije došao na nešto bolju ili su neki došli na manju platu, došli su u vrijeme kada su sve oči uprte u ljude koji trebaju da vode procese, kada bilo ko ko ima primisao da radi neke koruptivne radnje nije baš svoj, u vremenu kada je ogroman teret i oni su svi prihvatili da rade to. I nema razloga da u startu stavljate samare nama koje ne zaslužujemo. One koji nam trebaju slažemo se. Ali nemojte nas odmah u startu osuđivati nemojte ove ljude odmah degradirati. Stalno ima neka kontrateza. Lako je naći neku primjedbu. Niko nije pohvalio nikoga. Ljudi koji dođu iz realnog sektora privrede naprave egzistenciju naprave neki solidan kapital za život, normalno žive pa ga onda neko osuđuje zašto nije iz branše. Pa sam onda vidio neke analitičare koji kažu aha evo i mene i ostalih mada ja stvarno to dugo nemam kao problem. Nismo možda kompetentni. A onda negdje drugo kažu ja ali bi trebali birati one koji su dobili glasove. Pa evo ja sam dobio glasove ali nisam. Znači u tome se možemo vratiti stalno. Vi imate našu hrabrost odlučnost, dobru volju za ove procese, nama treba vaša politička podrška za procese koji su dobri. Kritika za koji nisu, imat ćete priliku javno pitat će vas stalno novinari kada nismo ovdje slobodno vi to radite. Kritikujte, predlažite za početak mi dajte za Ekspoze stvari koje mislite da bi trebali doraditi. Ili sačekajte kada ga ja objavim pa ga dopunite pa ću ja to prihvatiti i da tako funkcionišemo u naredne četiri godine. Ili kada nas vi eventualno na nekoj drugoj matematičkoj bazi smijenite ja ne bih bio sretan da nas smijenite zato što ne radimo ono što smo rekli. To bi za mene bio poraz. Svaki drugi ovim političkim tokovima, sutra neka nova koalicija matematika, ja sam to prošao ovdje tri puta u prošlim mandatu, ne bi mi bilo teško da to prodemo ni sada, ali nemojte nas u startu limitirati i dajte nam malo vremena da radimo svoj posao. Hvala.

Predsjedavajući:

Zahvaljujemo uvaženom budućem premijeru Konakoviću.

MOLIM POSLANIKE DA PRISTUPE IZJAŠNJAVANJU O PRIJEDLOGU ODLUKE O POTVRĐIVANJU VLADE KANTONA SARAJEVO U CJELINI, U SKLADU SA ČLANOM 205. STAV 1 POSLOVNIKA SKUPŠTINE KANTONA SARAJEVO.

Od prisutnih 35, ZA je glasalo 22 zastupnika, UZDRŽANIH nije bilo i PROTIV je bilo 13 zastupnika.

KONSTATUJEM DA JE DONIJELA ODLUKU O POTVRĐIVANJU VLADE KANTONA SARAJEVO U SASTAVU KOJI JE I PREDLOŽEN.

Molim članove Vlade, uvažene ministrice i ministre, da pristupe davanju Svečane izjave. Predsjedavajući je čitao tekst Svečane izjave, a članovi Vlade su ponavljali za njim.

„SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO, PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO, ZALAGATI SE ZA LJUDSKA PRAVA I SLOBODE I DA ĆU U SVIM PRILIKAMA ŠTITITI INTERESE BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I RAVNOPRAVNOST NARODA I GRAĐANA KOJI U NJIMA ŽIVE“.

Zadovoljstvo mi je da u svoje ime, u ime dopredsjedavajućeg i svih uposlenika u Skupštini Kantona Sarajevo čestitam Vladi Kantona i zaželim uspjeh u budućem radu. Vjerujem da ćemo ostvariti uspješnu saradnju na zadovoljstvo svih nas, ali prije svega na zadovoljstvo građana Kantona Sarajevo.

Također, koristim ovu priliku da se zahvalim prethodnom sazivu Vlade na saradnji i želim im svako dobro i sreću u budućem radu.

Koristim priliku da vas napomenem da imenovanjem gđina Konakovića na mjesto premijera Kantona Sarajevo istom prestaje mandat poslanika u Skupštini Kantona Sarajevo, o čemu će se službeno obavijestiti Centralna izborna komisija i pokrenuti postupak dodjele mandata sljedećem kvalificiranom kandidatu sa liste iste političke partije.

Dajem pauzu od 20 minuta kako bi smo mogli pristupiti čestitanju novoimenovanom premijeru i ministrima. Na insistiranje nove Vlade dajemo pauzu od sat vremena. Hvala.

NASTAVAK NAKON PAUZE

Predsjedavajući:

Prelazimo na 2. tačku dnevnog reda.

AD – 2.

PRIJEDLOG ODLUKE O IZBORU PREDSEDVAJUĆIH, ZAMJENIKA PREDSEDVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO

Prijedlog odluke ste dobili u dopunskom materijalu.

Da li ima potrebe da Predlagač obrazloži ovaj prijedlog? Ima li pitanja? Otvaram raspravu. Ukoliko se niko ne javlja za riječ, evo imamo uvaženi zastupnik Forto.

Poslanik Edin Forto:

Evo ja bih, govorimo o komisijama?

Predsjedavajući:

Prijedlog odluke o izboru predsjedavajućih, zamjenika predsjedavajućih i članova radnih tijela, Skupštine Kantona Sarajevo.

Poslanik Edin Forto:

Odustajem.

Predsjedavajući:

OK. Ukoliko se niko ne javlja za riječ zaključujem raspravu.

MOLIM POSLANIKE DA PRISTUPE IZJAŠNJAVANJU O PRIJEDLOGU ODLUKE O IZBORU PREDSEDJEDAVAJUĆIH, ZAMJENIKA PREDSEDJEDAVAJUĆIH I ČLANOVA RADNIH TIJELA, SKUPŠTINE KANTONA SARAJEVO

ZA JE GLASALO 31 POSLANIK.

KONSTATUJEM DA JE SKUPŠTINA DONIJELA ODLUKU O IZBORU PREDSEDJEDAVAJUĆIH, ZAMJENIKA PREDSEDJEDAVAJUĆIH I ČLANOVA RADNIH TIJELA, SKUPŠTINE KANTONA SARAJEVO.

AD – 3.

PRIJEDLOG ODLUKE O IMENOVANJU PREDSEDJEDNIKA, ZAMJENIKA PREDSEDJEDNIKA I ČLANOVA ODBORA ZA JAVNA PRIZNANJA KANTONA SARAJEVO

Prijedlog odluke ste dobili u dopunskom materijalu.

Da li ima potrebe Predlagač da objasni ovaj prijedlog? Nema. Ima li pitanja? Nema. Otvaram raspravu. Ukoliko se (više) niko ne javlja za riječ, zaključujem raspravu.

MOLIM POSLANIKE DA PRISTUPE IZJAŠNJAVANJU O PRIJEDLOGU ODLUKE O IMENOVANJU PREDSEDJEDNIKA, ZAMJENIKA PREDSEDJEDNIKA I ČLANOVA ODBORA ZA JAVNA PRIZNANJA KANTONA SARAJEVO.

ZA JE GLASALO 32 POSLANIKA, SUZDRŽAN NIKO I PROTIV NIKO .

KONSTATUJEM DA JE SKUPŠTINA DONIJELA ODLUKU O IMENOVANJU PREDSEDJEDNIKA, ZAMJENIKA PREDSEDJEDNIKA I ČLANOVA ODBORA ZA JAVNA PRIZNANJA KANTONA SARAJEVO.

AD – 4.

PRIJEDLOG ODLUKE O IMENOVANJU ZAMJENIKA PRAVOBRANIOCA PRAVOBRANILAŠTVA KANTONA SARAJEVO

Prijedlog odluke ste dobili u dopunskom materijalu.

Molim predstavnika Predlagača da podnese uvodne napomene. Ima li potrebe? Nema. Ima li pitanja? Otvaram raspravu. Ukoliko se niko ne javlja za riječ, zaključujem raspravu.

MOLIM POSLANIKE DA PRISTUPE IZJAŠNJAVANJU O PRIJEDLOGU ODLUKE O IMENOVANJU ZAMJENIKA PRAVOBRANIOCA PRAVOBRANILAŠTVA KANTONA SARAJEVO

ZA JE GLASALO 32 POSLANIKA, SUZDRŽANO NIKO I PROTIV NIKO.

KONSTATUJEM DA JE SKUPŠTINA DONIJELA ODLUKU O IMENOVANJU ADEMA FESTIĆA ZA ZAMJENIKA PRAVOBRANIOCA PRAVOBRANILAŠTVA KANTONA SARAJEVO.

Prije stupanja na dužnost zamjenik pravobranioca daje Svečanu izjavu. Molim gospodina Adema Festića da pristupi davanju Svečane izjave.

Tekst Svečane izjave čita predsjedavajući a zamjenik pravobranioca ponavlja:

„IZJAVLJUJEM DA ĆU SE U VRŠENJU SLUŽBE ZAMJENIKA PRAVOBRANIOCA PRIDRŽAVATI USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I DA ĆU SLUŽBU VRŠITI SAVJESNO“.

Čestitam.

Peta tačka dnevnog reda Poslanička/zastupnička pitanja i inicijative. Prije toga ću vam samo pročitati.

AD – 5.

Uvažene zastupnice i zastupnici, također želim da prije prelaska na samu realizaciju dnevnog reda definišemo budući rad tako što ćemo se podsjetiti na odredbe Poslovnika koje se odnose na tzv. „Vladin sat“.

„Na svakoj redovnoj sjednici izdvojiće se sat vremena (Vladin sat) za poslanička/zastupnička pitanja, na početku sjednice, kojem obavezno prisustvuju premijer i članovi Vlade.

Jedan poslanik na jednoj redovnoj sjednici može postaviti najviše dva poslanička pitanja.

Odgovori na poslanička/zastupnička pitanja mogu se davati usmeno ili pismeno“.

Poslanici u okviru tačke dnevnog reda „Poslanička pitanja i odgovori“ imaju pravo i dužnost da pokreću inicijative iz nadležnosti Skupštine Kantona.

Poslaničko pitanje se podnosi predsjedavajućem Skupštine u pisanoj formi, a on ga odmah prosljeđuje predsjedniku Vlade ili onome ministru kome je upućeno.

Poslanik koji postavlja poslaničko pitanje u podnesku navodi da li traži usmeni odgovor na sjednici Skupštine ili pisani odgovor.

Poslanička pitanja u pisanoj formi dostavljaju se najkasnije do zaključenja sjednice.

Kada se traži usmeni odgovor, podnesak je jasno i kratko formulisan jednim pitanjem.

Obrazloženje pitanja obavlja se tako što poslanik postavlja pitanje u vremenu do tri minute, nakon čega premijer ili nadležni ministar odgovara u istom trajanju.

Ukoliko poslanik nije zadovoljan odgovorom, može postaviti novo pitanje u vremenu od dvije minute, nakon čega se premijeru ili nadležnom ministru omogućava odgovor u istom trajanju.

Nakon drugog odgovora predsjedavajući Skupštine zaključuje razmatranje tog pitanja i daje riječ slijedećoj osobi ovlaštenoj da govori.

Dakle, u skladu sa Poslovníkom, kada zastupnik dobije riječ ima tri minute da postavi pitanje, da pokrene inicijativu, da komentariše itd. Nakon toga ukoliko je postavio usmeno pitanje i kaže da traži odgovor na to usmeno pitanje prozivam predstavnika predlagača da odgovori na pitanje. Kada istekne 60 minuta, svi oni koji nisu uspjeli doći na red, svoja pitanja i inicijative dostavit će u pismenoj formi do zaključenja sjednice. Hvala.

Sada je tačno 14,46 minuta. Znači sada počinjemo sa poslaničkim pitanjima i inicijativama.

AD – 1.

POSLANIČKA/ ZASTUPNIČKA PITANJA I INICIJATIVE

Ovako javili su nam se uvaženi zastupnik Solaković, uvaženi zastupnik Bajrović, uvaženi zastupnik Akšamija, uvažena zastupnica Omerbegović i uvažena zastupnica Avdibegović i uvažena zastupnica Bibija i uvažena zastupnica Filipović i uvaženi zastupnik Pindžo.

Poslanik/zastupnik Adnan Solaković:

Klub poslanik/zastupnik SBB pokreće inicijativu za izmjene člana 30. zakona o javnom okupljanju Kantona Sarajevo kojima bi se iznašao drugi način finansiranja MUP-a Kantona Sarajevo prilikom osiguranja domaćih i ino utakmica te u okviru svojih nadležnosti urgira da se stavi van snage Pravilnik o vrsti, cijeni i načinu plaćanja usluga dodatnog angažovanja policijskih službenika i drugih usluga koje Uprava policije MUP-a Kantona Sarajevo pruža u svrhu osiguranja javnih skupova izvan svoje redovne djelatnosti. Zahtijevamo hitni prestanak daljnjeg fakturisanja usluga osiguranja domaći i međunarodnih utakmica sarajevskim fudbalskim klubovima, FK Sarajevo, FK Olimpik i FK Željezničar od strane MUP-a Kantona Sarajevo a po osnovu predmetnog zakona i pravilnika do donošenja zahtijevanih izmjena člana 30 Zakona o javnom okupljanju Kantona Sarajevo i shodno tome novog Pravnika. Da ne bih sada oduzimao vrijeme za obrazloženje malo je opširno, a ovo bi tražim da se Skupština izjasni o ovoj inicijativi odmah ako nije. Jer idu predstojeća kola i to se veliki problemi dešavaju i ne mogu da pokrije svoje finansijske troškove upravo što im je ovako nametnuto od strane MUP-a Kantona Sarajevo. Pa bih molio poslanike uvažene ako može da se ovo odmah stavi na glasanje, evo ja sam to podijelio.

Predsjedavajući:

Ovako evo po Poslovniku a sekretar će vam to odmah objasniti.

Pomoćnik sekretara Skupštine Almira Šetkić Kulovac:

Pozdravljam sve prisutne. S obzirom da je ovdje riječ o inicijativi za koju je potrebno očitovanje Vlade, član 213 Poslovnika propisuje da pokrenute poslaničke inicijative o kojima se Skupština izjašnjava traži se očitovanje Vlade, izjašnjavanje o istim se odgađa za naredno skupštinsko zasjedanje kako bi Vlada mogla da se očituje o pokrenutim inicijativama. Hvala.

Predsjedavajući:

Hvala uvaženom zastupniku Solakoviću.

Poslanik/zastupnik Adnan Solaković:

To je inicijativa gospodine predsjedavajući. Nije korektno od naše sekretarice da ovako iznosi sekretara, ja sam je pitao malo je bio drugačiji odgovor. Neću. O tom po tom. Idem na pitanje. Obratila nam se grupa građana RVI i civilnih žrtava rata u vezi prava na korištenje parking mjesta obilježenih za vozila sa vidno postavljenom jedinstvenom parking naljepnicom za tu vrstu parking mjesta a koju izdaje MUP: problem su nesavjesni vozači koji parkiraju vozila koja su obilježena sa nevažećim naljepnicama ili raznim akreditacijama, te ova grupa građana veoma često nema mjesta na tim parkinzima. Ovako često uzurpiranje navedenih mjesta dovodi do diskriminacije invalida od strane zdravih ali nesavjesnih vozača. Stoga tražimo od nadležnih i MUP-a da o redovnim poslovnima na terenu obilaze parking mjesta te sankcionišu parkirana vozila bez adekvatne validne naljepnice koju izdaje MUP odjela za registraciju vozila na osnovu Pravilnika o načinu obilježavanja vozila kojim upravlja osoba sa oštećenjem ekstremiteta. Razumijemo složenu sigurnosnu situaciju u Kanton Sarajevo te da je ovaj slučaj od manjeg značaja ali za invalide je ovo vrlo ozbiljan problem te smatramo da ga je moguće riješiti a da ne idu daleko evo imamo oko našeg Kantona sa divljim naljepnicama sa invalidskim koji su parkirani. Evo odmah nek siđu odmah će dvoje troje uhvatiti. Hvala lijepo.

Poslanik/zastupnik Izudin Bajrović:

Sa zadovoljstvom što konačno postoji adresa na koju se može uputiti inicijativa, upućujem inicijativu Ministarstvu obrazovanja nauke i mladih.

U vremenu kada je naše društvo u opštoj tranziciji, kada je naš narod a pogotovo mladi ljudi u potrazi za identitetom, i kada u toj potrazi često krenu pogrešnom i opasnom stranputicom, kada su manipulacije svake vrste moguće i svakodnevnne, kada su vrijednosti prema kojima se vodimo vrlo upitne, smatram da obrazovanje nikada nije bilo nasušnija potreba za čije jačanje bi svi mi trebali da udružimo snage. U takvom trenutku naša vlast je dozvolila da resor obrazovanja skoro dvije godine ostane bez ministra što ja nikako ne mogu shvatiti kao slučajnost već naprotiv kao svjesnu namjeru. Stoga od novog ministra ili novoizabranog ministra, izvinjavam se, tražim da napravi jedan sveobuhvatan i objektivan uvid u stanje obrazovnih ustanova na području Kantona na svim nivoima, dakle predškolsko, osnovno, srednje visoko, te da isti u vidu izvještaja dostavi ovoj Skupštini na uvid kako bi smo imali uvid u stepen devastiranost našeg obrazovnog sustava. Hvala.

Poslanik/zastupnik Goran Akšamija:

Poštovani predsjedavajući, dame i gospodo ovdje pokrećem jednu zastupničku inicijativu koju smo donijeli ustvari odluku na Klubu zastupnika DF-a a to je da se Skupštini Kantona Sarajevo predlaže da donese sljedeći zaključak:

Skupština Kantona Sarajevo zadužuje Vladu Kantona Sarajevo da bez odlaganja poduzme sve potrebne aktivnosti i uputi zahtjev Finansijskoj policiji FBIH za provođenje kontrole

poslovanja javnih preduzeća i javnih ustanova čiji je osnivač ili suosnivač Kanton Sarajevo. **Obrazloženje:**

U cilju rješavanja problema u javnim preduzećima u Kanton Sarajevo Skupština i Vlada Kantona Sarajevo moraju detektovati probleme u poslovanju pojedinačnih subjekata a posebno one koji su proizašli iz nezakonitosti u radu. Stoga je neophodno da Skupština i Vlada Kantona Sarajevo u okviru svojih nadležnosti sankcionišu eventualno nedomaćinsko upravljanje kriminal i korupciju u javnim preduzećima i javnim ustanovama u kojim ih finansijska policija kao zakonski ovlašteno, stručno i politički nepristrasno tijelo utvrdi. Obzirom na ograničene kapacitete u pogledu broja izvršila u Finansijskoj policiji te da je u pojedinim javnim preduzećima Kantona Sarajevo već obavila ili započela obavljanje kontrole poslovanja Vlada Kantona Sarajevo će u dogovoru sa rukovodstvom Finansijske policije utvrditi dinamiku izvršenja ovog zaključka i o istom kao i o rezultatima kontrole od strane Finansijske policije informisati skupštinu Kantona Sarajevo. Molim da ovaj prijedlog ide na glasanje od strane Skupštine.

Predsjedavajući:

Ne možemo ići isto na glasanje jer mora prvo ići na Vladu. Ne mora. Samo malo. Izvinjavam se idemo na glasanje. Ko je za?

Konstatujem da je Skupština usvojila Zaključak sa 33 glasa ZA.

Zaključak:

Skupština Kantona Sarajevo zadužuje Vladu Kantona Sarajevo da bez odlaganja poduzme sve potrebne aktivnosti i uputi zahtjev Finansijskoj policiji FBIH za provođenje kontrole poslovanja javnih preduzeća i javnih ustanova čiji je osnivač ili suosnivač Kanton Sarajevo.

Hvala.

Poslanik/zastupnik Omerbegović Mersiha:

Pozdravljam i selamim sve prisutne i u ime Kluba zastupnika DF-a u Skupština Kantona Sarajevo podnosim inicijativu kojom se predlaže Skupštini Kantona Sarajevo da donese sljedeći zaključak:

Zadužuje se Vlada Kantona Sarajevo da u roku od 30 dana pripremi i u skupštinsku proceduru uputi Nacrt zakona o državnoj službi u Kanton Sarajevo, uz sljedeće obrazloženje:

Dosadašnja primjena federalnom Zakona o državnoj službi u Kanton Sarajevo je samo prelazna mjera i u tom pogledu neophodno je donijeti kantonalne propise kojima će se upotpuniti rad državne službe u Kanton Sarajevo. U tom pravu sugerise se Vladi Kantona Sarajevo da zakonom ne predviđa osnivanje nove agencije za državnu službu na nivou Kantona Sarajevo već da u saradnji sa nadležnim organima u FBIH dogovore i propišu da se registar i ostale radnje vezane za državnu službu obavljaju jedinstveno na nivou FBIH. Dalje, da zakonom propišu način izbora državnih službenika u pravcu izbora po redoslijedu uspješnosti a ne sa liste uspješnih sve u cilju pravičnosti postizanja transparentnijeg izbora državnih službenika i efikasnijeg rada u državnoj službi. Jasnije konkretnije u kraćim rokovima propiše ocjenjivanje i utvrđivanje odgovornosti državnih službenika za rad odnosno nerad i propiše jasne zakonske procedure za imenovanje rukovodećih državnih službenika njihovo postavljenje, raspoređivanje, i razrješenje. Molim skupštinu da se i o ovom zaključku izjasni. Zahvaljujem.

Predsjedavajući:

Hvala uvaženoj zastupnici Omerbegović. Dajem na glasanje. Ko je za?

Može recite.

Poslanik/zastupnik Predrag Kojović.:

Izvinjavam se predsjedavajući, nisam htio reagovati prvi put. Da vam kažem ne možemo, mislim ja se ne osjećam konforno da ovako radimo. Mislim da bi ste trebali pustiti da svi iznesu inicijative i prijedloge pitanja. One o kojima mislite da se Skupština treba izjasniti moraju se umnožiti dostaviti poslanicima na klupe da ih možemo vidjeti u pisanom obliku i onda se možemo izjašnjavati o njima.

Predsjedavajući:

Dobro. Slažem se sa zastupnikom Kojovićem. Slažemo da nam se dostavi u pisanom pa ćemo poslije dati na glasanje.

Poslanik/zastupnik Neira Avdibegović:

Zahvaljujem gospodine predsjedavajući. S obzirom da je ovo moje prvo obraćanje pozdravljam sve prisutne u Sali kao i gledatelje koji prate našu današnju sjednicu. Ispred Kluba zastupnika DF-a predlažem Skupštini Kantona Sarajevo da donese *zaključak kojim zadužuje Vladu Kantona Sarajevo da bez odlaganja poduzme sve potrebne aktivnosti i uputi zahtjev Uredu za reviziju institucija u FBiH da izvrši kontrolu i uradi reviziju učinka u JP čiji je osnivač Kanton Sarajevo.*

Generalno povjerenje javnosti u zakonito, odgovorno, efikasno i efektivno korištenje resursa moguće je osigurati kroz provođenje revizije koja ima za cilj prikazati nezavisno mišljenje o izvršenju budžeta i finansijskim izvještajima, korištenju resursa i upravljanju državnom imovinom. Navedeno svakako doprinosi pouzdanom izvještavanju o korištenju budžetskih sredstava, transparentnom i kvalitetnom upravljanju javnim prihodima i troškovima i imovinom u Kanton Sarajevo. Kako bi smo na putu reformi u Kanton Sarajevo stekli povjerenje javnosti, neophodno je izvršiti reviziju učinaka poslovanja svih javnih preduzeća a u skladu sa međunarodno priznatim standardima revizije. Ured za reviziju institucija u FBiH treba da ustanovi da li se potrošnja javnih resursa ispunjenjem mandata sprovodi u skladu sa zakonom, te u skladu sa uspostavljenim računovodstvenim principima kao i principima ekonomičnosti, efikasnosti i efektivnosti. Navedeni proces će doprinijeti poboljšanju odgovornosti prema građanima, te kroz nezavisnu analizu trenutnog stanja utvrditi da li građani Kantona Sarajevo za utvrđenu cijenu dobiju adekvatnu uslugu. Molim Skupštinu da se izjasni i o ovom zaključku. Hvala.

Poslanik/zastupnik Bibija Kerla:

Pozdravljam sve prisutne. Novoj Vladi čestitam na hrabrosti a moje prethodne kolege su postavljali zaključke ja postavljam sada jedno pitanje. Zašto JU Apoteke Sarajevo nije u sistemu elektronskih recepata i ne pruža građanima usluge izdavanja lijekova, ortopedskih i ostalih pomagala što dovodi ustanova koja je u vlasništvu Kantona Sarajevo u neravnotežan položaj u odnosu na privatne apoteke. Ne znam ko će dati odgovor na ovo ali ja želim da dam jedno obrazloženje. Uposlenici JU Apoteke Sarajevo i dugogodišnji korisnici njihovih usluga žele da znaju razlog zbog kojeg nisu uvedeni elektronski recepti u poslovnim jedinicama Opštine Stari Grad, Ilijaš i Vogošća. Ovi recepti su već više od tri mjeseca implementirani u Starom Gradu a prije otprilike mjesec Vogošći i Ilijašu što se i te kako odrazilo na pad broja recepata u komercijalne prodaje. Ljekari porodične medicine i uposlenici ZZO upućuju pacijente u privatne apoteke da realizuju preuzimanje lijekova, trakica za mjerenje šećera u krvi i ostalih ortopedskih pomagala. Zamislite situaciju da uposlenici JU Apoteke Sarajevo moraju preuzimati svoje propisane terapije lijekova i pomagala u privatnim apotekama. Apsurd koji zaslužuje odgovor i reakciju odgovornih za stanje u JU Apoteke Sarajevo. Projekat elektronskih recepata se prema najavi Ministarstva zdravstva i ZZO nastavlja i u ostalim opštinama u narednom periodu pa je neprihvatljiva neopravdana situacija u kojoj su iz meni nepoznatni razloga JU Apoteke Sarajevo i njeni uposlenici dovedeni u podređeni

položaj u odnosu na privatni apotekarski sektor. Svima vama je poznato da je Skupština Kantona Sarajevo osnivač i sto postotni vlasnik JU Apoteke Sarajevo. Ja molim da mi se da i usmeni i pismeni odgovor na ovo pitanje. Hvala.

Poslanik/zastupnik Selma Filipović:

Pozdravljam još jednom prisutne i podnosim jednu inicijativu. Poštovani predsjedavajući svjedoci smo svakodnevnog povećanja svih oblika kriminala u Kanton Sarajevo. Sarajevo polako ali sigurno postaje grad u kojem nije sigurno se kretati ulicom zbog svakodnevnih pucnjava i ubistava u kojem ne smijete parkirati auto ispred zgrade jer vam može biti otuđeno, ujedno se i pitam zašto u Kanton Sarajevo broj otuđenih vozila duplo veći u odnosu na FBiH? Da li je to neki problem u policiji, politici, Tužilaštvu, strahu, neznanju ili sprezi, grad u kome dijete na ulici ne smije uzeti mobilni telefon da se javi jer može biti otet, gdje horde prosjaka i besposlenih vuku za rukav i traže marku kako bi je odnijeli šefu i time osigurali sebi hranu i smještaj. A gdje je u svemu tome naša policija? Šta je sa silnim strategijama o smanjenju kriminala, maloljetničkoj delikvenciji, o povećanju broja zaposlenih policajaca u Kanton Sarajevo, njihovoj boljoj opremljenosti, nabavka specijalne opreme, velikom novcu koji se troši iz budžeta bilo kantonalnog ili federalnog. Sve te aktivnosti bi trebale imati za rezultat da Kanton Sarajevo ima pod kontrolom i smanjenju stopu kriminaliteta. Ovo više nije isključivo stručno policijsko pitanje, ovo je široko društveno pitanje na koje se mora dati adekvatan odgovor i to ne samo policije već i drugih struktura, socijalni rad, školstvo, sport. A takav kvalitetan odgovor samo mi poslanici smo dužni utvrditi i usaglasiti kako bi Kanton Sarajevo bio ponovo siguran za život svih njenih građana a ne samo grad siguran za život ljudi koji imaju oružanu pratnju i službenu zaštitu. Krajnje je vrijeme da se Skupština ovim ozbiljno i detaljno pozabavi e iz tih razloga a i iz razloga što svi odgavaramo građanima koji su nas izabrali u ovo tijelo, tražim, tj zahtjevam hitnu tematsku sjednicu na kojoj bi se raspravljalo o sigurnosti u Kanton Sarajevo, i na kojoj bi se donijeli prijedlozi koji bi našim građanima omogućili sigurniji život u našem kantonu. Hvala lijepo.

Poslanik/zastupnik Mirsad Pindžo:

Zahvaljujem predsjedavajući. Ja imam dva pitanja. Prvo je za Tužilaštvo Kantona Sarajevo. Da li je Tužilaštvo Kantona Sarajevo provodilo istražne radnje i donijelo tužilačku odluku vezano za moguća počinjenja krivičnih djela u poslovima:

1. provođenje postupka javne nabavke i zaključivanja ugovora na realizaciji projekta rekonstrukcije tramvajske pruge u Sarajevu?
2. provođenje postupka javne nabavke i zaključivanja ugovora na realizaciji projekta rekonstrukcije prečistača Butila?
3. poslovanje JP ZIO 84 i dovođenje istog do ruba propasti.

Obrazloženje, sva tri predmeta pod navodnicima u prethodnim godinama su bila predmetom pitanja, rasprava pa i zaključaka na sjednicama Skupština Kantona Sarajevo. Na bazi dostupnih informacija meni a i javnosti ostala je sumnja u počinjenje niza krivičnih djela. Obzirom da se radi o višemilionski pa i desetine miliona teškim projektima i poslovima, građani Kantona Sarajevo imaju pravo da znaju da li je u ovim poslovima bilo nezakonitih radnji, a ako jeste ko je odgovoran i dokle se došlo u postupku procesuiranja odgovornih?

Drugo pitanje je vezano za ovo prvo ali se odnosi na Vladu Kantona Sarajevo obzirom da prethodna nije izvršila zaključke Skupštine. Tražim da Vlada Kantona Sarajevo dostavi zastupnicima Skupština Kantona Sarajevo

1. izvještaj o realizaciji zaključaka Skupštine donesenih u povodu razmatranja izvještaja o realizaciji projekta rekonstrukcije prečistača Butila uključujući i kopiju potpisanog ugovora o izvođenju radova sa odabranim izvođačem radova.

2. I drugo, izvještaj o realizaciji sanacionog programa JP ZOI 84, sa detaljnim izvještajem o utrošku kreditnih sredstava kako je to Skupština zaključila. Obrazloženje: prilikom razmatranja izvještaja o aktivnostima na realizaciji projekta rekonstrukcije prečistača Butila Skupština Kantona Sarajevo je donijela između ostalih i zaključak da se zadužuje Vlada Kantona Sarajevo da Skupštini dostavi na verifikaciju ugovor o izvođenju radova. Prethodna Vlada Kantona Sarajevo nije ispoštovala zaključke Skupštine i nikada nije dostavila ugovor ni na verifikaciju i odobrenje kao ni kopiju na znanje. Ali time treba da se bave pravosudni organi, a ja se nadam da nova Vlada Kantona Sarajevo svojim činjenjem ili ne činjenjem neće biti saučesnik u nezakonitim radnjama pojedinaca kao prethodna. Prilikom odobravanja kreditnog zaduženja za sanaciju JP ZOI84 Skupština je obavezala Vladu Kantona Sarajevo i organe preduzeća da povremeno informišu skupštinu o realizaciji sanacionog programa kao i detaljan izvještaj o utrošku kreditnih sredstava. Obzirom da je prema medijskim izvještajima kredit realiziran da iz medija od uposlenika kao i iz drugih izvora dolaze kontradiktorne informacije o stanju u preduzeću da zakonski ne postoji i ne rade organi preduzeća Skupštine i NO, da se selektivno stranačko-nepotističko-jaranski odpuštaju višak uposlenika bez obzira na potrebe preduzeća, nova nezakonita upošljavanja, povećanje dugovanja bez obzira na uspješnu zimsku sezonu i drugo, potrebno je da Vlada dostavi zvanične informacije o prednjem. Hvala lijepo.

Poslanik/zastupnik Zvonko Marić:

Hvala predsjedavajući. Ja dakle nemam inicijativu ali imam poslaničko pitanje. Budući da smo dobili novog ministra obrazovanja, može i usmeno da odgovori i kasnije i pismeno, a odnosi se na to, vama je svima poznato da se vrše stručni ispiti, odnosno održavaju stručni ispiti za profesore srednjih i osnovnih škola i da su na tim ispitima angažirani ljudi profesori sa fakulteta. Vi znate da kandidati plaćaju, finansiraju taj stručni ispit i da angažman tih profesora ne ide na teret budžeta. Budući da smo dobili od tih profesora od te grupe profesora inicijativu da postavimo pitanje, postavljamo stoga pitanje gdje završava taj novac jer oni nisu plaćeni i na neki način time je blokiran proces održavanja stručnih ispita što je veoma velika šteta i sami znate za proces obrazovanja. Dakle kandidati sami plaćaju svoje ispite i nije na teretu budžeta ali ti profesori nisu plaćeni. Dakle nisu im isplaćene naknade za svoj angažman. Hvala.

Poslanik/zastupnik Haris Pleho:

Hvala lijepo. Prije svega želim sve srdačno da pozdravim i poselamim. Također imam i ja jedno poslaničko pitanje koje upućujem novoizabranom ministru obrazovanja. Radi se o sljedećem, prema mojim informacijama u osnovnim školama i srednjim, postoji problem zapošljavanja nastavnika informatike na osnovu aktuelnog nastavnog programa i plana koji je propisao uslove, profil i stručnu spremu za izvođenje ovog predmeta. Ne postoji niti jedan obrazovni profil koji je naveden u aktuelnom nastavnom programu i planu da sada izlazi sa fakulteta. Npr. Diplomirani matematičar i informatičar ili diplomirani informatičar ne mogu na osnovu ovog propisa izvoditi nastavu jer nastavni program i plan nije usklađen. Postoji problem da preko 50% nastavnika informatike nema navedene uslove. Pitam Ministarstvo obrazovanja kada će se izmijeniti dio nastavnog plana u dijelu obrazovni profil da bi se omogućilo svim ovim nastavnicima da legalno predaju i ne strahuju od inspekcije rada. Postavljam pitanje dakle šta će ministar uraditi da se ovaj problem otkloni jer za narednu školsku godinu moramo stvoriti uslove da ovi kadrovi koji su osposobljeni a nisu u nastavnom programu i planu mogu izvoditi nastavu? Hvala lijepo.

Poslanik/zastupnik Rasim Smajić:

Zahvaljujem se predsjedavajući. Imam jedno poslaničko pitanje. Šta će Vlada Kantona uraditi da sprovede pravosnažne izvršne sudske presude koje su zaposlenici tražili po osnovu kršenja

radnog prava? Napominjem da je izvršavanje sudskih presuda krivično djelo i za koje neko mora odgovarati. Znači imamo veliki broj sudskih presuda koje su izvršne. Šta će Vlada po tom pitanju uraditi u narednom periodu ili u ovoj godini, nije bitno kada već. Toliko.

Predsjedavajući:

Hvala uvaženom zastupniku Smajiću:

Pošto nemamo više nikakvih prijava, imamo dva zaključka koja moramo dati na glasanje. Ovom prilikom se zahvaljujem uvaženom zastupniku Kojoviću na sugestiji. Znači imamo dva zaključka koja dajemo na glasanje.

Prvi zaključak je :

„Skupština Kantona Sarajevo zadužuje Vladu Kantona Sarajevo da bez odlaganja poduzme sve potrebne aktivnosti i uputi zaključke Uredu za reviziju institucija u FBiH, te izvrši kontrolu i uradi reviziju učinka u javnim preduzećima čiji je osnivač Kanton Sarajevo“.

Ko je za?

Sa 32 glasa podržali smo ovaj zaključak. Usvojili smo ga. Sa 30 glasova, pardon, moja greška.

Drugi Zaključak:

Zadužuje se Vlada Kantona Sarajevo da u roku od 30 dana pripremi i u skupštinsku proceduru uputi Nacrt zakona o državnoj službi u Kanton Sarajevo.

28 ZA, 2 protiv i niko suzdržan.

Konstatujem da je i ovaj Zaključak usvojen većinom.

Prije nego zaključimo ovu sjednicu dajem riječ uvaženom zastupniku a bivšem premijeru Muhamedu Kozadru da se obrati.

Poslanik/zastupnik Muhamed Kozadra:

Zahvaljujem uvaženi predsjedavajući, cijenjeni kolege poslanici, premijeru, članovi nove vlade, dragi građani, uvaženi gosti. Nisam imao priliku prije pauze da se obratim da čestitam novoj Vladi na izboru, premijeru na ekspozu koji je podnio i da se zahvalim staroj Vladi koja je funkcionisala evo gotovo dvije i pol godine, godinu i pol dana bez podrške. Znači poslije podnešene ostavke bili smo u smjeni ali smo radili i funkionisali onoliko koliko jesmo mogli. Ono što sam želio da poželim novoj Vladi da im se ne desi u ovom mandatu što se dešavalo u četiri Vlade prethodne. Znači imali smo četiri Vlade ako uzmemo u obzir i ovu koja je bez podrške. Da se ne desi i da izostane podrška ovog tijela, zakonodavnog tijela, jer bez vas, odnosno i ja sam dio zakonodavne vlasti ovdje nema Vlade koja će ispuniti bilo koje obećanje ili bilo koju zakonsku obavezu a jako je puno zakona koji ne ovise o nama gdje mora doći bez obzira na ono što jesmo mi htjeli ovdje, bez istovremenog i sveobuhvatnog, ta dva principa moraju biti na svim nivoima uvažena da bi postigli ono što želimo u ovoj državi. Mnogi zakonski propisi su nametnuli ponašanje odnosno nametnuli su izradu zakona ovog nivoa tako da bilo kakvo odstupanje bez obzira što mi to želimo i bez obzira što imamo projicirane dobre i pozitivne rezultate ne možemo ih usvojiti ako su u suprotnosti sa ovim zakonima. Isto tako ne bih vam želio da vam se dese poplave, da vam se dese najveće snježnene padavine, da vam se desi paljevina, da vam se dese štrajkovi i zaista kao član zakonodavnog tijela i moja malenkost uz ono iskustvo u izvršnoj i zakonodavnoj vlasti, evo skoro 20 godina bit ću vam na raspolaganju na otklanjanju svega onoga što je danas zaista ne želim iz ove pozicije govoriti ali mnoge stvari niko nije mogao riješiti bez obzira i na ekspozu koji jesu bili i na ovo o čemu govorimo i sada ova dva zaključka koja jesam usvojili. Vidjet ćemo da je to malo drugačije nego što se priča. Ali s istinom se treba suočiti jer stari kažu istina djeluje kao živa

soda zato se rijetko u oči baca. Slijepi ste onda kada dođete sa tom istinom i dođete do zida ali evo prilike sa željom da obnašate u toku ovog mandata, imat ćete puno posla ali će vam biti jako jako puno potrebne podrške od svih nas, bez obzira na političko opredjeljenje a svi smo rekli i danas govorimo, mi smo zbog građana. Jesmo zbog građana, ali zaista istu smo zakletvu, to sam nekoliko puta ponovio iza ove skupštinske govornice položili i oni koji jesu u izvršnoj vlasti i koji jesu u zakonodavnoj vlasti. Jedan od zaključaka jeste ovdje na tragu donošenja i promjene zakona o državnim službenicima. Moj osjećaj je a to je zasigurno tačno da su jedino ministri promjenljiva roba i niko više. Nas niko ne može bez izbora zakonodavnih promijeniti a ni državne službenike ne može niko tako lahko, može se postojati način i modus da neko k neće i ne želi da radi svoj posao on se može promijeniti ali bez tog nekakvoga komoditeta koji znači puna odgovornost, to jest fiskalna odgovornost koju mi danas potpisujemo i treba da je potpiše svako onaj, ona je jedna od najboljih stvari koja treba da se desi, i koja se desila, i one se do 15.03. moralo potpisati od strane svih onih koji upravljaju javnim sredstvima, da li u kojoj vrsti, ona bila da li u novčanom i li naturalnom nije bitno, ali upravljaju i raspoređuju u tom smislu želim vam da zaista uz puno zdravlja puno sreće, imate snage da odgovorite onome što je uvaženi Konaković danas kroz svoj Ekspoze rekao. Zahvaljujem još jednom.

Predsjedavajući:

Zahvaljujem uvaženom zastupniku Kozadri.

Obzirom da smo iscrpili sve tačke Dnevnog reda današnje sjednice zaključujem rad na 1. Radnoj sjednici i zahvaljujem se zastupnicima.

Rad na sjednici okončan u 15,20 sati.